

MESYUARAT KEDUA, PENGGAL KETIGA  
PARLIMEN KEEMPAT BELAS  
2020

**HARI KHAMIS : 13 OGOS 2020**

**JAWAPAN-JAWAPAN BAGI PERTANYAAN-PERTANYAAN JAWAB**  
**LISAN YANG TIDAK DIJAWAB DI DALAM DEWAN**  
**( SOALAN NO. 9 HINGGA NO. 49 )**

PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS

PERTANYAAN : LISAN

DARIPADA : TUAN ROBERT LAWSON CHUAT [BETONG]

TARIKH : 13 OGOS 2020 (KHAMIS)

**SOALAN**

TUAN ROBERT LAWSON CHUAT [ BETONG ] minta MENTERI KESIHATAN menyatakan sama ada Kementerian bercadang untuk menubuhkan makmal khas bertujuan untuk diagnosis penyakit virus berjangkit seperti COVID-19 di Sarawak.

**JAWAPAN**

Tuan Yang di-Pertua,

1. Untuk makluman Yang Berhormat, Kementerian Kesihatan Malaysia (KKM) **telah pun mempunyai perancangan untuk membina sebuah Kompleks Makmal Kesihatan di Batu 11, Jalan Kuching-Serian, Kuching, Sarawak.** Kerja-kerja awalan bagi projek ini telah pun diluluskan di bawah permohonan *Rolling Plan* 4 Rancangan Malaysia Kesebelas (RP4 RMK-11). Skop cadangan projek ini merangkumi Makmal Kesihatan Awam dan Makmal Keselamatan dan Kualiti Makanan. Makmal Kesihatan Awam ini meliputi Makmal Penyakit Berjangkit yang boleh digunakan untuk pengesanan dan pengesanan Covid-19.

2. Di samping itu, **Makmal Molekular khas untuk pengesanan dan pengesanan COVID-19 telah pun beroperasi di lima (5) buah hospital di Sarawak, iaitu Hospital Umum Sarawak, Hospital Sibu, Hospital Bintulu, Hospital Miri dan Pusat Jantung Sarawak.** Tambahan daripada itu, **Universiti Malaysia Sarawak (UNIMAS) dan Borneo Medical Centre** juga turut menjalankan ujian pengesanan dan

pengesahan COVID-19. Kesemua ini menjadikan jumlah kapasiti ujian Covid-19 bagi negeri Sarawak adalah sebanyak 2226 ujian sehari. Sehingga 6 Ogos 2020, sebanyak 91,156 ujian COVID-19 telah dijalankan di Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ROZMAN BIN ISLI [ LABUAN ]**

**TARIKH : 13 OGOS 2020 (KHAMIS)**

**SOALAN**

**DATUK ROZMAN BIN ISLI [ LABUAN ]** minta **MENTERI WILAYAH PERSEKUTUAN** menyatakan apakah status penyediaan dokumen RFP untuk Jambatan Labuan-Sabah, difahamkan Kementerian Wilayah Persekutuan telah menyerahkannya kepada Kementerian Kerja Raya.

**JAWAPAN**

Tuan Yang Di Pertua,

Seperti mana yang telah dipertegaskan oleh YB Menteri Wilayah Persekutuan semasa menggulung perbahasan Titah Diraja pada 05 Ogos 2020, tujuan awal Labuan menjadi sebahagian daripada Wilayah Persekutuan, bukan sahaja masih relevan tetapi perlu diberikan roh dan nafas yang baharu. Bukan lagi soal hanya integrasi nasional atau keselamatan negara atau hanya mempercepatkan tempoh pembangunan tetapi Labuan mempunyai kedudukan yang strategik dan boleh diangkat kepada satu kedudukan yang lebih tinggi sesuai dengan kedudukannya sebagai sebahagian daripada Wilayah Persekutuan.

Justeru untuk makluman Yang Berhormat Labuan, beberapa langkah sedang diambil oleh pihak Kementerian bagi merealisasikan

## SOALAN NO : 10

hala tuju ini dengan memberikan perhatian kepada beberapa program yang bersifat *game changer* untuk memberikan nafas baharu kepada Labuan termasuklah cadangan pembinaan jambatan yang menyambung Labuan dengan Tanah Besar Kepulauan Borneo khususnya Sabah. Pembinaan jambatan ini bukan sahaja akan meningkatkan aktiviti ekonomi dan kesalinghubungan (connectivity) antara wilayah tetapi yang lebih penting lagi memperlihatkan komitmen bersungguh Kerajaan Persekutuan dalam mendepani realiti geopolitik yang berlaku di rantau ini.

Untuk makluman Yang Berhormat Labuan, Kementerian Wilayah Persekutuan (KWP) sedang memuktamadkan Kertas Memorandum Jemaah Menteri (MJM) untuk mendapatkan kelulusan secara prinsip daripada Jemaah Menteri bagi melaksanakan cadangan pembinaan Jambatan Labuan-Sabah secara *Public Private Partnership (PPP)* melalui proses *Request for Proposal (RFP)*.

Pihak Kementerian akan bekerjasama dengan Kementerian Kerja Raya (KKR) dan Unit Kerjasama Awam Swasta, Jabatan Perdana Menteri (UKAS) dalam penyediaan Terma Rujukan bagi penyediaan dokumen RFP bagi menarik syarikat-syarikat yang berminat untuk mengemukakan cadangan-cadangan yang terbaik dan memberi kelebihan kepada Kerajaan dalam pelaksanaan projek ini.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI AHMAD FAIZAL BIN DATO'  
AZUMU [ TAMBUN ]**

**TARIKH : 13 OGOS 2020 (KHAMIS)**

**SOALAN**

**DATO' SERI FAIZAL BIN AZUMU [TAMBUN] minta MENTERI  
KESIHATAN menyatakan:**

- a) Berapakah jumlah mesin-mesin thermal di pintu-pintu masuk dan keluar Negara dan adakah jumlah mesin-mesin thermal ini mencukupi; dan
- b) Sekiranya tidak mencukupi, apakah Kementerian berhasrat untuk menambah bilangan alatan tersebut sebagai langkah waspada kepada merebaknya wabak-wabak peyakit yang merbahaya.

**JAWAPAN**

**Tuan Yang di-Pertua,**

1. Mesin-mesin thermal di pintu masuk negara adalah bertujuan untuk mengimbas suhu permukaan bagi pengembara-pengembara yang tiba di pintu masuk antarabangsa (PMA) negara. Mesin-mesin thermal ini telah ditetapkan untuk mengesan suhu badan yang menyamai atau lebih dari 37.5°C. Mana-mana pengembara yang didapati mempunyai suhu 37.5°C atau lebih oleh mesin thermal, akan diperiksa semula dengan menggunakan laser thermometer. Mana-mana pengembara yang mempunyai suhu menyamai 38 °C dan lebih akan dirujuk untuk pemeriksaan lanjut.

2. Sehingga **6 Ogos 2020**, Kementerian Kesihatan (KKM) telah menempatkan sebanyak **109 mesin thermal di 78 pintu masuk antarabangsa (PMA)** di negara ini, di mana setiap PMA mempunyai sekurang-kurang satu (1) mesin thermal dan jumlah ini adalah mencukupi untuk memantau mana-mana pengembara yang demam di PMA. **Dari 78 PMA ini, 17 adalah Pintu Masuk Darat, 42 adalah Pelabuhan dan Pos Kawalan Sempadan Imigresen, Kastam dan Kuarantin (ICQ) sementara 19 adalah Lapangan Terbang.**

3. Sehingga 6 Ogos 2020 dari 27 Januari 2020, seramai 781 telah dikesan sebagai *Person Under Investigation* (PUI) COVID-19 di PMA di mana mereka dikesan mempunyai demam atau mempunyai gejala COVID-19 atau disahkan positif dalam ujian COVID-19 di PMA.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TACK [ BENTONG ]**

**TARIKH : 13 OGOS 2020 (KHAMIS)**

**SOALAN**

minta **MENTERI SAINS, TEKNOLOGI DAN INOVASI** menyatakan apakah 'deadline' untuk semua sisa radioaktif WLP dipindahkan dari tapak kilang Lynas memandangkan AELB sendiri menyatakan ia perlu disegerakan disebabkan risiko banjir. Nyatakan pelan 'emergency response' sekiranya banjir besar di Gebeng pada tahun 2012 berlaku sekali lagi esok.

**JAWAPAN**

Tuan Yang di-Pertua,  
Untuk makluman Ahli Yang Berhormat,

Lembaga Perlesenan Tenaga Atom (AELB) telah mengenakan syarat dalam lesen Lynas, di mana PDF yang dibina hanya menempatkan residu *Water Leach Purification* (WLP) yang sedia ada dan sebarang residu WLP yang akan dihasilkan dari *Lynas Advanced Material Plant* (LAMP) sehingga Julai 2023. Semua residu yang berada di tapak kilang Lynas akan dipindahkan ke PDF selepas ianya siap dibina.

Tuan Yang di-Pertua,

Kawasan Perindustrian Gebeng di mana premis Lynas berada adalah bebas daripada ancaman banjir. Semasa kejadian banjir besar pada tahun 2014, kawasan ini tidak terjejas dengan bencana banjir. Perkara

ini disokong berdasarkan maklumat yang diperoleh daripada Jabatan Meteorologi Malaysia (METMalaysia), kawasan sekitar Gebeng mencatatkan jumlah hujan sebanyak 86.2 mm bagi bulan Januari dan 66.1 mm untuk bulan Februari. Jumlah ini adalah masing-masing 65% dan 46% lebih rendah daripada paras normal. Sehubungan dengan itu, METMalaysia tidak menjangkakan sebarang banjir besar akan berlaku pada masa terdekat di kawasan tersebut lebih-lebih lagi dengan Monsun Timur Laut yang telah berada dalam fasa akhir.

AELB juga turut menjalankan pemantauan secara berkala termasuk semasa Monsun Timur Laut dan berdasarkan pemerhatian ke atas kawasan kilang tersebut didapati kejadian banjir tidak berlaku dan kemungkinan kawasan kilang Lynas ditenggelami banjir amat rendah.

Walau bagaimanapun, di bawah pelan kecemasan Lynas, Lynas mempunyai satu sistem bersepadu kawalan air hujan (Stormwater Integrated System) yang akan berfungsi sekiranya berlaku kejadian lebihan air di LAMP ketika hujan lebat atau takungan air yang banyak di LAMP. Sistem ini akan mengepam air yang bertakung di permukaan kawasan penstoran sementara (RSF) untuk residu WLP dan akan mengalirkannya ke *water retention tank* yang akan merawat air tersebut dalam sistem tertutup. Air tersebut akan disimpan ke dalam sistem tersebut dan tidak akan dilepaskan ke persekitaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TAN SRI NOH BIN HAJI OMAR  
[TANJONG KARANG]**

**TARIKH : 13 OGOS 2020 (KHAMIS)**

**SOALAN**

**TAN SRI NOH BIN HAJI OMAR [ TANJONG KARANG ]** minta **PERDANA MENTERI** menyatakan sejauh manakah tahap integriti, kredibiliti dan profesionalisme Suruhanjaya Pencegahan Rasuah Malaysia (SPRM) yang telah bertindak secara tidak wajar apabila mendedahkan bukti rakaman audio berprofil tinggi kepada umum bertujuan untuk menimbulkan spekulasi dan sentiment negatif masyarakat awam terhadap kes yang sedang dibicarakan.

**JAWAPAN : (YB DATO' TAKIYUDDIN BIN HASSAN, MENTERI  
DI JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, rakaman audio yang didedahkan oleh pihak SPRM pada Januari 2020 adalah dibenarkan oleh undang-undang (*discretionary power*) dan tidak melanggar mana-mana peruntukan undang-undang.

Walau bagaimanapun, berdasarkan perkembangan terkini pihak Polis Diraja Malaysia (PDRM) telah pun melengkapkan siasatan dan dimajukan kepada Pejabat Peguam Negara pada 19 Jun 2020 yang lalu untuk mendapatkan nasihat dan pandangan selanjutnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN PRABAKARAN A/L M.ARAMESWARAN  
[ BATU ]**

**TARIKH : 13 OGOS 2020 (KHAMIS)**

**SOALAN**

**TUAN PRABAKARAN A/L M PARAMESWARAN [ BATU ]** minta **MENTERI WILAYAH PERSEKUTUAN** menyatakan apakah cara penguatkuasaan yang akan diambil bagi menangani peniaga haram dari kumpulan PATI dan pemegang kad UNCHR di seluruh pusat bandar Kuala Lumpur terutamanya di Pasar Borong Selayang, Pasar Borong Kuala Lumpur, sekitar Bukit Bintang terutamanya di Plaza Low Yat, Imbi dan Jalan Alor.

**JAWAPAN**

Tuan Yang di-Pertua,

Untuk makluman Yang Berhormat, Dewan Bandaraya Kuala Lumpur (DBKL) maklum dengan aktiviti perniagaan penjaja warga asing dalam Wilayah Persekutuan Kuala Lumpur khususnya di Pasar Borong Kuala Lumpur dan Pasar Harian Selayang. Mereka terdiri daripada warga Indonesia, Bangladesh, Myanmar (Pelarian Rohingya Pemegang Kad UNHCR) dan Nepal. Isu banjiriran warga asing yang tinggal, bekerja dan berniaga dalam Wilayah Persekutuan Kuala Lumpur

## SOALAN NO : 14

merupakan tanggungjawab bersama Agensi-Agensi Kerajaan di bawah Kementerian Dalam Negeri (KDN), *United Nations High Commissioner for Refugees (UNHCR)* Malaysia dan Dewan Bandaraya Kuala Lumpur (DBKL).

Pihak DBKL secara khususnya seringkali melaksanakan tindakan penguatkuasaan terhadap mana-mana warga asing yang didapati menjalankan aktiviti penjajaan tanpa lesen. Tindakan sitaan serta merta terhadap pelbagai barangan perniagaan akan dilaksanakan dan semua barangan yang disita tidak boleh dituntut berdasarkan peruntukan di bawah :

- i. Undang-Undang Kecil Pelesenan Penjaja (Wilayah Persekutuan Kuala Lumpur) 2016.
- ii. Undang-Undang Kecil Pelesenan Pasar (Wilayah Persekutuan Kuala Lumpur) 2016.
- iii. Undang-Undang Kecil Pasar Borong (Wilayah Persekutuan Kuala Lumpur) 2002.

Untuk makluman Yang Berhormat, statistik tindakan penguatkuasaan terhadap penjaja warga asing dalam Wilayah Persekutuan Kuala Lumpur sepanjang tahun 2019 sebanyak 5,745 tindakan pelbagai barangan perniagaan penjaja warga asing telah disita. Manakala bagi bulan Januari hingga Julai 2020 sebanyak 1,375 tindakan pelbagai barangan perniagaan penjaja warga asing telah disita.

DBKL juga telah menempatkan anggota penguatkuasa pada setiap hari dengan masa bertugas 24 jam untuk membuat pemantauan dan mengambil tindakan penguatkuasaan ke atas penjaja-penjaja di Pasar Borong Kuala Lumpur dan Pasar Harian Selayang khasnya kepada penjaja warga asing. Sepanjang tahun 2019 melalui rondaan harian sebanyak 2,246 tindakan pelbagai barangan perniagaan penjaja warga asing telah disita. Manakala bagi bulan Januari hingga Julai 2020

sebanyak 857 tindakan pelbagai barangan perniagaan penjaja warga asing telah disita.

DBKL juga turut memprogramkan Operasi 'TEGAS' iaitu tindakan bersepadu ke atas warga asing bersama-sama dengan Agensi Kerajaan lain seperti Kementerian Perdagangan Dalam Negeri dan Hal Ehwal Pengguna (KPDNHEP), Polis Diraja Malaysia (PDRM), Jabatan Imigresen Malaysia (JIM), Jabatan Pendaftaran Negara (JPN), Suruhanjaya Pencegahan Rasuah Malaysia (SPRM), Jabatan Sukarelawan Malaysia (RELA) dan Jabatan-Jabatan dalaman DBKL.

Sepanjang tahun 2019 sebanyak 35 Siri Operasi TEGAS telah dilaksanakan dengan sebanyak 390 tindakan sitaan pelbagai barangan perniagaan penjaja warga asing disamping seramai 98 orang warga asing ditahan untuk pemeriksaan Jabatan Imigresen Malaysia. Manakala bagi bulan Januari hingga Julai 2020 sebanyak 3 Siri Operasi TEGAS dilaksanakan dengan sebanyak 92 tindakan sitaan pelbagai barangan penjaja warga asing di samping seramai 16 orang warga asing ditahan untuk pemeriksaan Jabatan Imigresen Malaysia.

Sekian, terima kasih.

**PEMBERITAHUAN PERTANYAAN BAGI JAWAPAN LISAN  
MESYUARAT KEDUA, PENGGAL KETIGA  
PARLIMEN KEEMPAT BELAS  
MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : TUAN CHE ALIAS BIN HAMID [ KEMAMAN ]**

**TARIKH : 13 OGOS 2020 (KHAMIS)**

**SOALAN**

**TUAN CHE ALIAS BIN HAMID [ KEMAMAN ]** minta **MENTERI PERUSAHAAN PERLADANGAN DAN KOMODITI** menyatakan perancangan strategik lima tahun akan datang dalam meningkatkan eksport minyak dan produk sawit ke negara Pakistan.

**JAWAPAN**

Tuan Yang Di-Pertua,

Antara perancangan Kementerian dalam meningkatkan eksport minyak dan produk sawit ke negara Pakistan adalah:

- i. Meningkatkan penggunaan minyak sawit dalam sektor makanan dan bukan makanan di Pakistan.**

Penggunaan minyak sawit di Pakistan kebanyakan adalah dalam industri perhotelan, restoran dan juga pembuatan vanaspati. Kementerian melalui Lembaga Minyak Sawit Malaysia (MPOB) sedang menggiatkan usaha untuk meluaskan penggunaan secara terus minyak sawit sebagai pengganti vanaspati dalam masakan serta penggunaan minyak sawit olein sebagai minyak untuk menggoreng. Bagi sektor bukan makanan, penekanan akan diberikan kepada penggunaan stearin sawit dalam pembuatan sabun, bahan pencuci dan juga asid lemak sawit. Usaha-usaha ini sedang dilaksanakan melalui penganjuran seminar, pameran dan lawatan khidmat nasihat teknikal.

**ii. Sokongan kepada projek usahasama Malaysia**

Pada masa ini, terdapat 6 projek usahasama yang beroperasi di Pakistan dan projek-projek tersebut sangat penting dan strategik dalam mengekalkan pegangan pasaran minyak sawit Malaysia di Pakistan. Antara projek-projek tersebut adalah *Mapak Qasim Bulklers*, *Mapak Edibel Oil Refinery*, *Liquid Cargo terminal*, *Mapak Edible Oils / Oil Seed Crushing Plant*, *Tank Storage Terminal* dan *Bulk Cargo Warehouse* yang merupakan usahasama antara syarikat-syarikat Malaysia (Felda, KLK, IOI) bersama Westbury Group. Kehadiran dan penglibatan syarikat Malaysia di kawasan logistik utama dalam pengendalian satu-satunya jeti kargo cecair, kemudahan penapisan dan penyimpanan fizikal terbesar di negara Pakistan memberikan kelebihan untuk mengekalkan kehadiran minyak sawit Malaysia di pasaran Pakistan. Kerajaan akan terus menyokong projek-projek ini melalui perhubungan antara Kerajaan (*Government to Government – G to G*) dengan penglibatan daripada Kementerian Perdagangan Antarabangsa dan Industri (MITI) dalam aspek pemasaran serta memperluaskan projek usahasama Malaysia dalam sektor hiliran.

**iii. Pelaksanaan Pensijilan Minyak Sawit Mampan Malaysia (MSPO)**

Pelaksanaan MSPO sebagai langkah menjenamakan minyak sawit Malaysia yang mampan dan berkualiti dalam meningkatkan akses pasaran di Pakistan.

**iv. Meningkatkan daya saing minyak sawit Malaysia di Pakistan.**

Kajian sedang dijalankan untuk mengkaji semula perjanjian perdagangan bebas di antara Pakistan dan Malaysia di bawah *Malaysia Pakistan Closer Economic Partnership Agreement* (MCEPA). Namun perkara ini melibatkan pelbagai pemegang taruh yang lain seperti Kementerian Luar, Kementerian Perdagangan Antarabangsa dan Industri (MITI) dan lain-lain.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WILLIAM LEONG JEE KEEN  
[SELAYANG]**

**TARIKH : 13 OGOS 2020**

**SOALAN**

**TUAN WILLIAM LEONG JEE KEEN [ SELAYANG ]** minta **MENTERI PERDAGANGAN ANTARABANGSA DAN INDUSTRI** menyatakan status rundingan mengenai Perkongsian Ekonomi Komprehensif Serantau (RCEP) dan kesan India menarik diri dari RCEP.

**JAWAPAN**

Tuan Yang di-Pertua,

1. Perjanjian perdagangan bebas antara ASEAN dan 6 rakan-rakan dialognya yang dikenali sebagai Perjanjian Kerjasama Ekonomi Komprehensif Serantau atau dengan izin, *Regional Comprehensive Economic Partnership* (RCEP) telah dilancarkan pada bulan November 2012 sewaktu Sidang Kemuncak ASEAN Ke-21 di Kemboja. Rundingan telah bermula secara rasmi pada tahun 2013.

2. Sebanyak 28 pusingan rundingan telah diadakan sejak bulan Mei 2013 sehingga bulan September 2019. Selepas pusingan ke-28 dan pada Sidang Kemuncak RCEP ke-3 pada bulan November 2019, semua 20 Bab yang terkandung dalam Perjanjian ini telah berjaya dimuktamadkan kecuali beberapa perkara teknikal berkaitan dengan rundingan akses pasaran serta perkara-perkara yang melibatkan negara India.

3. Pada tahun ini, sebanyak 5 mesyuarat maya (*Virtual Meeting*) di peringkat Ketua Perunding atau dengan izin, *Trade Negotiation Committee (TNC)*, telah diadakan iaitu pusingan Ke-29 dari 20 hingga 24 April 2020, pusingan Ke-30 dari 13 hingga 20 Mei, Mesyuarat Khas TNC pada 10 dan 11 Jun, pusingan Ke-31 pada 9 Julai serta Mesyuarat Intersesi TNC Ke-8 pada 7 Ogos 2020. Selain itu, 1 mesyuarat intersesi Ke-10 peringkat Menteri telah dijalankan secara maya pada 23 Jun 2020. Mesyuarat-mesyuarat tersebut diadakan bertujuan untuk memuktamadkan beberapa isu tertunggak yang telah disebutkan sebelum ini.

4. Menurut data Bank Dunia pada tahun 2018, RCEP dengan penglibatan India akan membolehkan Malaysia mengakses 47.5 peratus saiz pasaran atau hampir separuh jumlah penduduk dunia iaitu 3.6 bilion orang. Nilai KDNK gabungan pula ialah AS\$27.5 trilion atau 32 peratus nilai KDNK dunia. Nilai dagangan barang atau *merchandise trade*, dengan izin, dicatatkan sebanyak AS\$11.5 trilion atau 29.13% daripada jumlah dagangan barang dunia. Negara-negara tersebut merupakan pelabur terbesar rantau ASEAN dengan aliran Pelaburan Langsung Asing (FDI) sebanyak AS\$39 bilion atau 25.7 peratus daripada jumlah FDI iaitu AS\$152.6 bilion.

5. Sekiranya India menarik diri daripada RCEP, ia akan mengurangkan impak RCEP dari segi saiz pasaran. Walau bagaimanapun, bagi Malaysia, kita masih boleh meningkatkan akses pasaran ke negara India menerusi kajian semula *Malaysia-India Comprehensive Economic Cooperation Agreement (MICECA)* dan ASEAN-India FTA.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK HAJAH AZIZAH BINTI DATUK SERI  
PANGLIMA HAJI MOHD DUN [BEAUFORT]**

**TARIKH : 13 OGOS 2020 (KHAMIS)**

**SOALAN**

**DATUK HAJAH AZIZAH BINTI DATUK SERI PANGLIMA HAJI MOHD DUN [ BEAUFORT ]** minta **MENTERI KESIHATAN** menyatakan adakah Kementerian bercadang untuk membina sebuah Hospital Pakar Jantung di Sabah dan Sarawak.

**JAWAPAN**

**Tuan Yang di-Pertua,**

1. Untuk makluman YB Beaufort, **perkhidmatan rawatan jantung** di Hospital Kementerian Kesihatan Malaysia (KKM) telah pun sedia ada di Sabah dan Sarawak. Perkhidmatan jantung ini merangkumi perkhidmatan subkepakaran kardiologi, pediatrik kardiologi, pembedahan kardiotorasik, serta kardiak anesthesiologi dan perfusi.
2. Di negeri **Sabah**, perkhidmatan jantung bermula pada tahun 2009 di Hospital *Queen Elizabeth II* (HQE II), Kota Kinabalu. Buat masa ini, perkhidmatan disediakan oleh dua (2) pakar kardiologi, satu (1) pakar pediatrik kardiologi, satu (1) pakar bedah kardiotorasik dan dua (2) pakar kardiak anesthesiologi dan perfusi. Pada tahun ini, HQE II akan menerima seorang lagi pakar bedah kardiotorasik. Selain daripada memiliki dua (2) dewan bedah khusus untuk pembedahan kardiotorasik, pusat ini juga mempunyai satu (1) Makmal Invasif Kardiologi (ICL) bagi rawatan invasif

tanpa pembedahan kepada pesakit jantung. Terdapat juga perancangan untuk menambah satu (1) lagi Makmal Invasif Kardiologi di pusat ini bagi menampung beban kerja dan pertambahan pesakit jantung terutama yang memerlukan rawatan invasif.

3. Di negeri **Sarawak** pula, perkhidmatan jantung disediakan di Pusat Jantung Sarawak (PJS), dengan seramai lima (5) pakar kardiologi, dua (2) pakar pediatrik kardiologi, dua (2) pakar bedah kardiotorasik dan dua (2) pakar kardiak anestesiologi dan perfusi. Pusat ini mempunyai dua (2) dewan bedah kardiotorasik dan tiga (3) Makmal Invasif Kardiologi.

4. Selain berfungsi sebagai pusat rawatan jantung, kedua-dua hospital ini juga merupakan pusat latihan kepada pakar-pakar jantung dan pakar-pakar juga mempunyai penglibatan aktif dalam menjalankan kajian klinikal perubatan (*clinical research*). Pada tahun 2016, PJS telah diiktiraf oleh *Royal College of Surgeons of Edinburgh, United Kingdom* sebagai Pusat Latihan Subkepakaran Pembedahan Kardiotorasik.

5. Kementerian Kesihatan sentiasa komited dalam memberikan rawatan yang terbaik kepada pesakit jantung di Malaysia, termasuk di Sabah dan Sarawak dan akan terus memperkembangkan perkhidmatan ini mengikut keperluan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN FONG KUI LUN [ BUKIT BINTANG ]**

**TARIKH : 13 OGOS 2020 (KHAMIS)**

**SOALAN**

**TUAN FONG KUI LUN [ BUKIT BINTANG ]** minta **MENTERI WILAYAH PERSEKUTUAN** menyatakan kedudukan Projek *River of Life* di Kuala Lumpur, Kemajuan yang dicapai dan baki yang belum diselesaikan dan apakah penyiapannya mencapai piawaian yang ditetapkan.

**JAWAPAN**

Tuan Yang Di Pertua,

Untuk makluman Yang Berhormat Bukit Bintang, Kementerian Wilayah Persekutuan (KWP) sedang mentransformasikan Lembangan Sungai Klang yang melibatkan jajaran 110km sejak tahun 2011 melalui Projek *River of Life* (RoL). Antara sasaran utama projek ini adalah menjadikan 10.7km Sungai Klang dan Sungai Gombak sebagai ikon *waterfront* yang dinamik dan berdaya huni dengan nilai ekonomi yang tinggi di samping meningkatkan kualiti air sungai sedia ada.

Projek RoL yang bernilai RM4.36 bilion ini telah mencapai 92% siap. Manakala sasaran *Water Quality Index* (WQI) pada Kelas 2 bagi 10.7km di sepanjang Sungai Klang dan Sungai Gombak hanya akan tercapai selepas semua projek yang dirancang dapat dilaksanakan serta beroperasi sepenuhnya pada tahun 2024.

Ketika ini, kemajuan yang dicapai projek RoL adalah masih terkawal di mana 2 komponen utama projek ini iaitu Pembersihan dan Pengindahan hanya lewat 1% berbanding jadual serta masing-masing dijangka siap pada tahun 2024 (Pembersihan) dan akhir tahun 2020 (Pengindahan).

Sekian, terima kasih.

**PEMBERITAHUAN PERTANYAAN  
MESYUARAT KEDUA, PENGGAL KETIGA  
PARLIMEN KEEMPAT BELAS (2020)  
DEWAN RAKYAT**

---

**PERTANYAAN : LISAN**

**DARIPADA : DATO' HAJI MOHD. SALIM SHARIF [JEMPOL]**

**TARIKH : 13 OGOS 2020 ( KHAMIS )**

**SOALAN**

Minta **PERDANA MENTERI** menyatakan pelan strategi bagi mengembalikan kepercayaan rakyat terhadap institusi Tabung Haji (TH) yang telah terpalit dengan skandal sehingga menimbulkan pelbagai spekulasi dan kekeliruan dalam kalangan masyarakat.

**JAWAPAN :     YB DATUK DR. ZULKIFLI MOHAMAD AL-BAKRI,  
MENTERI DI JPM (HAL EHWAL AGAMA)**

Tuan Yang Di-Pertua,

Untuk makluman Ahli Yang Berhormat, isu urustadbir Tabung Haji (**TH**) merupakan antara isu yang kerap kali dibahaskan, samada di dalam Dewan Rakyat, di kalangan umum mahupun di media massa. Tumpuan umum difokuskan ke arah **TH** bagi memastikan segala urustadbir yang dibuat sentiasa menepati hasrat penubuhan dan matlamatnya selaku institusi kewangan terbesar umat Islam di negara ini.

Justeru, adalah menjadi keutamaan kerajaan hari ini untuk memastikan perjalanan urus tadbir **TH** sentiasa kekal pada landasannya. Kerajaan amat memahami bahawa dalam menilai segala transaksi yang dilakukan oleh Tabung Haji, perlunya kepada suatu badan yang bebas dan berautoriti. Justeru, Mesyuarat Jemaah Menteri pada masa terdekat akan membincangkan sedalam-dalamnya berkenaan isu Tabung Haji, termasuk cadangan serta kewajaran penubuhan Suruhanjaya Siasatan Diraja (RCI). Kerajaan sedang meneliti dengan serius terhadap keperluan dan rangka struktur berkenaan perkara tersebut.

Ingin saya tegaskan bahawa segala yang akan dilakukan oleh Kerajaan adalah dengan niat yang suci, untuk mencari titik penyelesaian yang boleh diterima semua pihak, serta untuk memastikan segala urus tadbir Tabung Haji menepati kepentingannya sebagai institusi milik umat Islam di negara ini.

Sekian. Terima kasih.



**PEMBERITAHUAN PERTANYAAN DEWAN RAKYAT,  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN KARUPAIYA A/L MUTUSAMI  
(PADANG SERAI)**

**TARIKH : 13 OGOS 2020 (KHAMIS)**

**SOALAN**

Minta **MENTERI PERTAHANAN** menyatakan tentang rungutan para remaja yang tidak terpilih atas alasan-alasan yang tidak munasabah selepas menghadiri temuduga untuk menyertai angkatan tentera. Adakah kuota untuk kaum India bagi menyertai angkatan tentera sudah dipenuhi.

**JAWAPAN**

Tuan Yang di-Pertua,

Kerajaan sentiasa membuka peluang dan menggalakkan penyertaan para remaja serta belia dari kalangan masyarakat pelbagai kaum termasuk bukan Bumiputera, India dan Cina untuk menyertai Angkatan Tentera Malaysia (ATM).

Sehingga kini, ATM tidak menerima sebarang aduan daripada mana-mana pihak berhubung rungutan para remaja yang tidak terpilih atas alasan-alasan yang tidak munasabah selepas menghadiri temuduga untuk menyertai ATM. Sekiranya ada, diharapkan pihak tersebut tampil untuk membuat aduan rasmi di saluran yang tepat agar pihak-pihak bertanggungjawab dapat mengambil tindakan yang sewajarnya.

Mengikut rekod, calon-calon yang tidak terpilih adalah mereka yang tidak memenuhi syarat-syarat yang diperlukan baik dari segi kelayakan akademik mahu pun saringan kesihatan.

ATM membuka tawaran penyertaan secara terbuka tanpa menetapkan sebarang kuota kepada semua kaum dan tidak sesekali akan berkompromi dengan syarat kemasukan Pegawai dan Askar Lasykar yang sedang berkuatkuasa.

Unit Transformasi Masyarakat India (MITRA) juga pernah mengadakan mesyuarat dengan ATM dan menjalinkan kerjasama rapat termasuk mengadakan inisiatif-inisiatif seperti hebahan maklumat, kerjasama dengan Persatuan Veteran ATM dan juga NGO India serta penglibatan ikon anggota India dalam usaha menarik minat remaja kaum India menyertai perkhidmatan ATM.

Terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. HAJI DZULKEFLY  
BIN AHMAD [ KUALA SELANGOR ]**

**TARIKH : 13 OGOS 2020 (KHAMIS)**

**SOALAN**

**DATUK SERI DR. HAJI DZULKEFLY BIN AHMAD [KUALA SELANGOR]**  
minta **MENTERI KESIHATAN** menyatakan :-

- a) apakah usaha Kementerian untuk mewajibkan ibu bapa bayi untuk mendapatkan suntikan vaksin 5-serangkai (DtaP/IPV/HiB) agar dapat memutuskan rantaian penularan penyakit cegahan vaksin dalam komuniti; dan
- b) setakat ini, berapa kadar jumlah pesakit dengan wabak berkait dengan mereka yang tidak mendapat vaksin 5-serangkai.

**JAWAPAN**

**Tuan Yang di-Pertua,**

1. Program Imunisasi Kebangsaan telah dilaksanakan sejak tahun 1950an dan pemberian vaksin 5-serangkai (DtaP/IPV/HiB) bermula pada tahun 2008 untuk memberi perlindungan kepada 5 jenis penyakit iaitu penyakit difteria, tetanus (kancing gigi), pertussis (batuk kokol), poliomyelitis dan penyakit akibat jangkitan bakteria Haemophilus influenzae type b (Hib).

2. Pada tahun 2019, Kementerian Kesihatan Malaysia telah mewujudkan **Jawatankuasa Kerja (Task Force)** yang melibatkan pelbagai agensi pemegang taruh (*stakeholders*) untuk meneliti kebolehlaksanaan tindakan mewajibkan imunisasi kepada bayi dan kanak-kanak. Antara pemegang taruh yang terlibat terdiri dari agensi kerajaan seperti Kementerian Pendidikan Malaysia, Kementerian Pembangunan Wanita, Keluarga dan Masyarakat, dan JAKIM agensi swasta, badan bukan kerajaan (NGO) dan persatuan yang berkaitan serta panel pakar seperti Pakar Perubatan Kanak-kanak, Pakar Perubatan Keluarga dan Pakar Perubatan Kesihatan Awam juga dilibatkan dalam proses mengumpul pandangan setiap sudut sekiranya imunisasi diwajibkan. Cadangan pindaan akta yang berkaitan serta tanggungjawab ibu bapa dan penjaga juga dibincang dengan teliti dan KKM turut meneliti undang-undang sedia ada di Malaysia dan juga di negara lain di seluruh dunia. Walaubagaimanapun, setelah meneliti aspek pelaksanaan dan implikasi penggunaan kaedah perundangan, **KKM bersetuju mengambil pendekatan untuk tidak menggunakan kaedah perundangan untuk mewajibkan pemberian imunisasi kepada kanak-kanak di Malaysia.** Pengukuhan dan penambahbaikan kepada penyampaian perkhidmatan sedia ada termasuk meningkatkan aktiviti pengesanan kes cicir dan pendekatan secara pendidikan dan promosi telah dipersetujui oleh pihak KKM.
3. Untuk memastikan kejayaan Program Imunisasi demi untuk mencegah penularan penyakit cegahan vaksin dalam komuniti, **liputan imunisasi yang tinggi (melebihi 95%) diperlukan.** Imunisasi melindungi komuniti apabila sebahagian besar daripada mereka telah diberi imunisasi terhadap penyakit cegahan vaksin dan ini menyebabkan bakteria atau virus sukar untuk merebak dalam komuniti tersebut. Imuniti kelompok tercapai apabila seluruh komuniti dilindungi daripada jangkitan penyakit cegahan vaksin melalui liputan imunisasi yang tinggi.
4. Kementerian Kesihatan juga memantau kejadian dan tren penyakit cegahan vaksin di seluruh Malaysia. Vaksin 5-serangkai DTaP-IPV//Hib diberi kepada kanak-kanak untuk mencegah **penyakit difteria, tetanus**

(kancing gigi), pertussis (batuk kokol), polio dan Haemophilus influenzae type b (Hib).

5. Bagi 5 penyakit diatas, sepanjang tahun 2019, sebanyak:

- a) **16 kes** telah disahkan difteria dilaporkan dengan enam (6) kes kematian dicatatkan. Lima (5) kes kematian adalah terdiri dari kanak-kanak yang tidak mempunyai rekod imunisasi. Kadar insiden adalah 0.05 kes per 100,000 penduduk.
- b) **30 kes tetanus** dilaporkan dengan satu (1) kes kematian dan semua kes kematian tiada rekod imunisasi. Kadar insiden adalah 0.09 kes per 100,000 penduduk.
- c) **915 kes batuk kokol** dilaporkan dengan 20 kes kematian dan semua kes kematian tiada rekod imunisasi. Kadar insiden adalah 2.74 kes per 100,000 penduduk.
- d) **3 kes polio** telah dilaporkan dan tiada kematian dilaporkan. Kadar insiden adalah 0.01 kes per 100,000 penduduk.
- e) **4 kes** penyakit yang disebabkan oleh Haemophilus influenzae type b (Hib) dilaporkan dan tiada kematian dilaporkan. Kadar insiden adalah 0.01 kes per 100,000 penduduk.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' SERI HAJI ABDUL HADI BIN  
AWANG [MARANG]**

**TARIKH : 13 OGOS 2020**

**SOALAN :**

**YB DATO' SERI HAJI ABDUL HADI BIN AWANG [ MARANG ]** minta **PERDANA MENTERI** apakah langkah dan pelan tindakan yang diambil terhadap etnik Rohingya yang cuba memasuki sempadan Malaysia ketika negara sedang menghadapi penularan wabak COVID-19.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Bagi tempoh pelaksanaan Perintah Kawalan Pergerakan (PKP), kerajaan telah menetapkan bahawa semua warganegara asing tidak dibenarkan untuk memasuki negara demi melindungi rakyat negara ini daripada wabak COVID-19 yang kini berstatus pandemik. Justeru, golongan pelarian daripada mana-mana negara asing termasuk Rohingya juga tidak terkecuali daripada ketetapan ini.
2. Walau bagaimanapun, bagi isu kemasukan warga asing di sempadan negara (bukan pintu masuk utama), warga asing itu tidak boleh diusir serta merta dan warga asing tersebut perlu ditahan kerana melakukan kesalahan memasuki Malaysia melalui laluan yang tidak dibenarkan. Perintah usir hanya boleh dilaksanakan selepas warga

asing itu dikenakan tindakan undang–undang sewajarnya menurut suatu perintah usir yang dikeluarkan oleh Ketua Pengarah Jabatan Imigresen di bawah Akta Imigresen 1959/63 [Akta 155].

3. Pada 8 Jun 2020, telah berlaku kemasukan 269 orang Pendatang Asing Tanpa Izin (PATI) etnik Rohingya dengan menggunakan bot yang sengaja dirosakkan di perairan Langkawi. Kesemua PATI ini dibawa ke Kem Wawasan Negara Langkawi. Ini menjadikan jumlah keseluruhan PATI etnik Rohingya yang berada di kem tersebut adalah berjumlah seramai 521 orang iaitu termasuk 252 orang yang ditahan pada 7 Mac 2020 sebelum PKP dikuatkuasakan oleh Kerajaan.

4. Kedua-dua insiden kemasukan PATI ini masih di dalam siasatan pihak keselamatan yang berkaitan terutamanya dalam aspek penyeludupan manusia, kesalahan memasuki negara tanpa mempunyai dokumen yang sah, elemen penglibatan jenayah terancang serta aspek – aspek keselamatan yang lain.

5. Justeru, sekiranya hasil siasatan juga mendapati bahawa PATI etnik Rohingya tersebut memerlukan perlindungan antarabangsa berdasarkan kepada prinsip *non-refoulement* yang diguna pakai di peringkat antarabangsa dan pengecualian yang diberikan kepada warga asing yang mungkin memerlukan perlindungan antarabangsa oleh pihak United Nations High Commissioner for Refugees (UNHCR), atas dasar kemanusiaan, golongan ini mungkin tidak diusir dan dibenarkan untuk berada secara sementara di dalam negara sehingga mereka ini ditempatkan ke negara ketiga yang lain atau pulang ke negara asal apabila krisis di wilayah Rakhine, Myanmar mulai reda.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI DR. MUJAHID  
BIN YUSOF RAWA [PARIT BUNTAR]**

**TARIKH : 13 OGOS 2020 ( KHAMIS )**

**SOALAN**

Minta **PERDANA MENTERI** menyatakan sama ada RUU Wakaf 2020 yang telah disiapkan oleh Kerajaan Pakatan Harapan yang lalu akan diteruskan oleh Kerajaan sekarang.



**JAWAPAN**

**YB SENATOR DATUK DR. HAJI ZULKIFLI MOHAMAD AL-BAKRI,  
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, Kerajaan berhasrat untuk meneruskan RUU Wakaf dan ia disasarkan untuk dibentangkan di Dewan yang mulia ini dalam Mesyuarat yang akan datang.
2. RUU Wakaf ini sudah pasti akan memberikan impak yang sangat signifikan dalam pembangunan wakaf di Wilayah-Wilayah Persekutuan. Wakaf yang ditadbir urus dengan baik berlandaskan lunas undang-undang yang lebih komprehensif, dinamik dan progresif akan memberi kebaikan bukan sahaja kepada masyarakat Muslim bahkan tempias manfaatnya akan turut dirasakan oleh masyarakat bukan Islam.
3. Untuk makluman Ahli Yang Berhormat juga, RUU Wakaf kini dalam peringkat akhir penggubalan dan sedang disemak oleh Bahagian Gubalan, Jabatan Peguam Negara.

Sekian, terima kasih.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATO' SERI HAJI ABDUL HADI BIN AWANG  
[ MARANG ]**

**TARIKH : 13 OGOS 2020 ( KHAMIS )**

**SOALAN**

**DATO' SERI HAJI ABDUL HADI BIN AWANG [MARANG]** minta **MENTERI LUAR NEGERI** menyatakan apakah langkah yang diambil oleh Kerajaan bagi meneruskan proses tuntutan terhadap baki kawasan pelantar negara Malaysia di bahagian utara Laut China Selatan.

**JAWAPAN**

Tuan Yang di-Pertua,

Saya mengucapkan terima kasih kepada Yang Berhormat Marang atas pertanyaan yang dikemukakan.

2. Untuk makluman Dewan yang mulia ini, pada 12 Disember 2019, Malaysia telah mengemukakan *partial submission* iaitu tuntutan kawasan had pelantar benua di utara *Dangerous Ground* di Laut China Selatan kepada *Commission on the Limits of the Continental Shelf* (CLCS).

3. Ini merupakan kesinambungan kepada tuntutan secara bersama atau dengan izin, *joint submission* di antara Malaysia dan Vietnam yang telah dikemukakan kepada CLCS pada tahun 2009. *Joint submission* tersebut adalah terhadap had sempadan pelantar benua melebihi 200 batu nautika dari garis pangkal laut wilayah di bahagian paling selatan Laut China Selatan.

4. Tuntutan Malaysia adalah selaras dengan peruntukan Artikel 76, Konvensyen Undang-Undang Laut 1982 (KUUL 1982). Tuntutan Malaysia adalah berdasarkan data-data saintifik dan teknikal. Tuntutan ini juga adalah tanpa prejudis terhadap pembatasan (*delimitation*) sempadan maritim dengan negara-negara penuntut Laut China Selatan yang berkaitan.

5. *Partial Submission* Malaysia telah menerima bantahan daripada China dan Filipina, iaitu negara-negara penuntut Laut China Selatan. Berhubung dengan perkara ini, Malaysia tetap menegaskan bahawa tindakan yang diambil oleh Malaysia adalah selaras dengan undang-undang antarabangsa khususnya KUUL 1982.

6. Malaysia masih menunggu pemakluman tarikh baharu bagi sesi pembentangan *partial submission* yang sebelum ini dijadualkan akan diadakan pada bulan Ogos 2020 di Ibu Pejabat Pertubuhan Bangsa-Bangsa Bersatu di New York, Amerika Syarikat. Pembentangan tersebut telah ditangguhkan oleh CLCS berikutan wabak pandemik COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK LIEW VUI KEONG [BATU SAPI]**

**TARIKH : 13 OGOS 2020 (KHAMIS)**

**SOALAN**

**YB DATUK LIEW VUI KEONG [BATU SAPI] minta PERDANA MENTERI menyatakan:-**

(a) sama ada kesemua Menteri dan Timbalan Menteri telah mengisytiharkan aset- aset mereka kepada Suruhanjaya Pencegahan Rasuah Malaysia; dan;

(b) sekiranya mereka telah mengisytiharkan aset mereka, adakah pengisytiharan ini akan disiarkan untuk ketetapan umum.

**JAWAPAN: (YB DATO' TAKIYUDDIN BIN HASSAN, MENTERI DI JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, semua Ahli Jemaah Menteri telahpun mengemukakan sesalinan pengisytiharan harta mereka kepada Suruhanjaya Pencegahan Rasuah Malaysia (SPRM). Bagi Timbalan Menteri pula, hanya terdapat 5 orang sahaja lagi yang belum berbuat demikian.

Pada masa ini, paparan pengisytiharan harta melalui laman web SPRM hanya akan dibuat setelah Kerajaan memutuskan satu kaedah baru dalam pemaparan mengenai jumlah harta/pendapatan yang telah diisytiharkan. Sekian, terima kasih.

**PEMBERITAHUAN PERTANYAAN  
MESYUARAT KEDUA, PENGGAL KETIGA  
PARLIMEN KEEMPAT BELAS  
DEWAN RAKYAT**

---

**PERTANYAAN : LISAN**

**DARIPADA : TAN SRI NOH BIN HAJI OMAR [ TANJONG  
KARANG ]**

**TARIKH : 13 OGOS 2020 ( KHAMIS )**

**SOALAN**

Minta **PERDANA MENTERI** menyatakan apakah justifikasi perpindahan hak milik empat buah operasi dan perkhidmatan hotel Tabung Haji iaitu di Kuala Terengganu, Pulau Pinang, Alor Setar dan Kota Kinabalu kepada anak syarikat milikan penuh UJ, UJ Property Management Sdn Bhd (UJPM) bermula 1 April 2020.

**JAWAPAN : YB DATUK DR. ZULKIFLI MOHAMAD AL-BAKRI,  
MENTERI DI JPM (HAL EHWAL AGAMA)**

Tuan Yang Di-Pertua,

Untuk makluman, empat (4) buah hotel **TH** yang dipindahkan kepada Urusharta Jamaah Sdn Bhd (UJSB) yang dimiliki penuh Kerajaan Malaysia pada 28 Disember 2018 adalah keputusan kerajaan Pakatan Harapan sebelum ini. Justifikasi penjualan tersebut oleh kerajaan terdahulu adalah ianya merupakan sebahagian daripada pelan penstrukturan semula aset-aset **TH**.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KHALID BIN ABD SAMAD [ SHAH ALAM ]**

**TARIKH : 13 OGOS 2020 (KHAMIS)**

**SOALAN**

**TUAN KHALID BIN ABD SAMAD [ SHAH ALAM ]** minta **MENTERI WILAYAH PERSEKUTUAN** menyatakan apakah usaha perancangan Kementerian untuk membangunkan Kampung Baru, Kuala Lumpur.

**JAWAPAN**

Tuan Yang Di Pertua,

Untuk makluman Yang Berhormat Shah Alam, Kementerian Wilayah Persekutuan (KWP) sejak sekian lama telah menjalankan pelbagai usaha dan pendekatan di dalam membangunkan Kampong Bharu. Walau bagaimanapun, pelaksanaan pembangunan semula Kampong Bharu secara komprehensif berdasarkan Pelan Konsep Kampong Bharu 2019 dan tawaran pembelian tanah didapati amat sukar diteruskan kerana tidak mendapat persetujuan 100 peratus pemilik tanah (hanya 61 peratus persetujuan) dan juga melibatkan anggaran kos pembelian tanah yang tinggi sebanyak RM7.4 bilion dan kos-kos lain sehingga mencecah hampir RM10 bilion.

Sehubungan ini, Kementerian telah merangka pendekatan pembangunan yang lebih fokus dan mengikut keutamaan bagi memenuhi

keperluan pembangunan di Kampong Bharu. Kementerian secara serius akan melaksanakan dengan kadar segera perkara-perkara berikut:

- 1) Menaiktaraf infrastruktur dan jalan-jalan utama di kawasan Kampong Bharu dengan kos sebanyak RM353 juta melalui permohonan peruntukan RMKe-12;
- 2) Melaksanakan pembangunan secara parcel/blok yang telah dikenalpasti mengikut keutamaan iaitu di kawasan sekitar Masjid Jamek Kampong Bharu dan blok-blok tanah yang telah mendapat persetujuan pemilik tanah. Pembangunan ini boleh dilaksanakan secara usahasama dengan Syarikat Berkaitan Kerajaan (GLC) atau pemaju-pemaju yang berminat. Dalam hal ini, Perbadanan Pembangunan Kampong Bharu (PKB) akan bertindak sebagai fasilitator bagi melancarkan pembangunan yang akan dilaksanakan agar mengikut dasar dan syarat-syarat yang ditetapkan oleh pihak Kerajaan; dan
- 3) Kementerian juga akan mengenalpasti satu kawasan yang sesuai untuk dibangunkan sebagai “Food Haven Kampong Bharu” bagi menempatkan semula gerai-gerai makanan secara lebih tersusun dan menarik.

Adalah menjadi keutamaan Kementerian agar hasrat dan harapan pemilik dan pewaris tanah untuk melihat Kampong Bharu dibangunkan sebagai pusat komersil Melayu di pusat bandaraya Kuala Lumpur tercapai di masa akan datang dan pemilikan tanah masih kekal kepada orang Melayu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN SHAHARIZUKIRNAIN BIN ABD.  
KADIR [SETIU]**

**TARIKH : 13 OGOS 2020 (RABU)**

**SOALAN**

Minta **PERDANA MENTERI** menyatakan usaha-usaha yang telah dibuat oleh Kerajaan dalam memastikan pelaksanaan ibadah korban boleh dilakukan pada Hari Raya Aidiladha semasa dalam tempoh wabak COVID-19 ini.



**JAWAPAN**

**YB SENATOR DATUK DR. HAJI ZULKIFLI MOHAMAD AL-BAKRI,  
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, Kerajaan sangat prihatin terhadap keperluan umat Islam di negara ini agar dapat menunaikan kewajiban dan amal ibadah walaupun sedang melalui tempoh Perintah Kawalan Pergerakan sepanjang dilanda wabak COVID-19 melalui Garis Panduan dan Prosedur Operasi Standard (SOP) yang berkaitan. Sehubungan itu, Kerajaan juga telah membenarkan umat Islam di negara ini untuk menunaikan ibadah korban sempena sambutan Aidiladha semasa tempoh Perintah Kawalan Pergerakan Pemulihan (PKPP).

2. Kerajaan melalui JAKIM juga telah menyediakan Garis Panduan Pelaksanaan Ibadah Korban Dalam Tempoh PKPP yang telah dibincangkan dalam Mesyuarat Jawatankuasa Muzakarah Khas Majlis Kebangsaan Bagi Hal Ehwal Ugama Islam Malaysia (MKI) Kali Ke-6 yang bersidang pada 9 Jun 2020, yang juga melibatkan wakil daripada Kementerian Kesihatan Malaysia (KKM), Majlis Keselamatan Negara (MKN) dan Jabatan Perkhidmatan Veterinar (JPV). Jawatankuasa Muzakarah MKI telah bersetuju dengan garis panduan tersebut yang dijadikan asas kepada Prosedur Operasi Standard (SOP) Ibadah Korban dan telah dikuatkuasakan melalui Arahan Ketua Pengarah Kesihatan Malaysia, dibawah Peraturan 10, Peraturan-Peraturan Pencegahan dan Pengawalan Penyakit Berjangkit (Langkah-Langkah Di Dalam Kawasan Tempatan Jangkitan) (No.7) yang telah diwartakan sebagai [P.U. (A) 181/2020].

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN WONG SHU QI [KLUANG]**

**TARIKH : 13 OGOS 2020 (KHAMIS)**

**SOALAN**

**PUAN WONG SHU QI [KLUANG]** minta **MENTERI PERDAGANGAN ANTARABANGSA DAN INDUSTRI** menyatakan pencapaian sebagai Menteri sepanjang 2 tahun dalam Kerajaan Pakatan Harapan dan pencapaian seratus hari sebagai Menteri Kanan dalam Kerajaan Perikatan Nasional.

**JAWAPAN**

Tuan Yang di-Pertua,

1. Untuk makluman Yang Berhormat, pencapaian sebagai Menteri sepanjang 2 tahun dalam Kerajaan Pakatan Harapan adalah seperti berikut:

- i. Pengenalan, penetapan hala tuju dan pelaksanaan dasar:
  - a) Wawasan Kemakmuran Bersama 2030 (WKB 2030);
  - b) Rancangan Malaysia Kedua Belas (RMKe-12);
- ii. Penyediaan dan pengagihan Peruntukan Pembangunan berjumlah lebih daripada RM9 bilion melibatkan:
  - a) Enam (6) negeri kurang membangun iaitu Perlis, Kedah, Kelantan, Terengganu, Sabah dan Sarawak; serta

- b) Wilayah Ekonomi Koridor Utara (NCER) dan Wilayah Ekonomi Pantai Timur (ECER);
- iii. Pelaksanaan pelaburan di wilayah-wilayah ekonomi dengan peruntukan komited berjumlah RM78.66 bilion dan RM47.44 bilion pelaburan direalisasi, yang menghasilkan 49,324 peluang pekerjaan melibatkan:
  - a) Wilayah Ekonomi Koridor Utara (NCER);
  - b) Wilayah Ekonomi Pantai Timur (ECER);
  - c) Iskandar Malaysia (IM);
  - d) Koridor Pembangunan Sabah (SDC); dan
  - e) Koridor Tenaga Boleh Diperbaharui Sarawak (SCORE);
- iv. Penyediaan dan pengagihan peruntukan pembangunan luar bandar dan peruntukan sosioekonomi berjumlah RM23.34 bilion melibatkan:
  - a) 295 projek berkaitan jalan luar bandar dan perhubungan desa, bekalan air luar bandar, bekalan elektrik, serta program ameniti sosial;
  - b) 2,362 projek berkaitan Sektor Kesihatan dan Kependudukan, Sektor Pembangunan Luar Bandar dan Masyarakat serta Sektor Pelajaran dan Pendidikan;
  - c) Peruntukan khusus pembangunan dan 35 sekolah daif di Sabah dan Sarawak; dan
  - d) Peruntukan Khas 2019 untuk 614 unit kemudahan seperti rumah ibadat, dewan komuniti, pusat pendidikan dan jalan raya.
- v. Penglibatan dan penyediaan bantuan dalam sektor pertanian berjumlah RM6.78 bilion melibatkan:

- a) Pembentangan Kertas Putih FELDA di Parlimen pada 10 April 2019 berkaitan Pelan Pemulihan FELDA, pengurangan hutang, pengurusan kewangan dan sebagainya;
  - b) Bantuan Pembangunan Kawasan Tanam Semula Getah serta Bantuan Peningkatan Produktiviti dan Pembangunan Pekebun Kecil RISDA;
  - c) Pelaksanaan Pertanian Pintar;
  - d) Pengagihan keuntungan 2019 yang lebih tinggi bagi FELCRA Berhad; dan
  - e) Pemberian Bantuan Musim Tengkujuh (BMT) 2019.
- vi. Penyediaan peruntukan Pembangunan Inklusif dalam Menangani Kemiskinan berjumlah RM356.14 juta melibatkan:
- a) Program Peningkatan Kapasiti dan Kapabiliti Kumpulan Sasar Khusus;
  - b) Pemerkasaan Pembangunan Masyarakat Orang Asli;
  - c) Program Usahawan Sosial Hebat (PUSH);
  - d) Pemerkasaan Pembangunan Masyarakat India;
  - e) Dana Pembiayaan dan Kemajuan Kampung Baru Cina; dan
  - f) Kasih Ibu Darul Aman (KIDA).
- vii. Pemerkasaan Pembangunan Industri Halal Negara:
- a) Kerjasama Ekonomi Malaysia-Korea Selatan berpaksikan *Look East Policy 2.0*; dan

- b) Penstrukturan Semula Agenda Pembangunan Industri Halal Negara melalui Majlis Pembangunan Industri Halal (MPIH);
- viii. Pemudahcara proses membuat keputusan melalui modenisasi dan inovasi statistik:
  - a) Pemberian aksesibiliti awam kepada aplikasi *MyLocal Stats 2.0*; dan
  - b) Pelancaran aplikasi *Malaysia Business Cycle Clock* (MBCC) dan *Trade by Enterprise Characteristic* (TEC).
- ix. Pelaksanaan program dan pengukuhan kerjasama antarabangsa seperti:
  - a) Penganjuran program Matlamat Pembangunan Mampan (*Sustainable Development Goals – SDG*);
  - b) Kerjasama strategik dengan Agensi *United Nations* dan *World Bank*;
  - c) Pengukuhan hubungan dua hala Malaysia-Russia; dan
  - d) Kerjasama Brunei Darussalam – Indonesia – Malaysia – Philippines *East Asean Growth Area* (BIMP-EAGA);
- x. Pengiktirafan peranan Bumiputera dalam penyediaan RMKe-12 dan WKB2030 dan penyediaan peruntukan Pembangunan Bumiputera sebanyak RM5.879 bilion untuk:
  - a) Unit Peneraju Agenda Bumiputera (TERAJU);
  - b) Yayasan Peneraju Pendidikan Bumiputera (YPPB);
  - c) Pelaburan Hartanah Berhad (PHB);
  - d) Ekuiti Nasional Berhad (EKUINAS); dan
  - e) Dana Mudahcara di bawah NCER.

2. Manakala, pencapaian seratus hari sebagai Menteri Kanan dalam Kerajaan Perikatan Nasional adalah seperti berikut:

- i. Mengetuai usaha pengurusan pembukaan semula sewaktu tempoh Perintah Kawalan Pergerakan (PKP);
- ii. Merencanakan pelan pembukaan ekonomi secara berkala dan teratur sepanjang PKP;
- iii. Memimpin Kementerian Perdagangan Antarabangsa dan Industri (MITI) dalam mengetuai sesi libat urus bersama industri sepanjang PKP;
- iv. Mengetuai penubuhan Jawatankuasa Khas Kabinet untuk pengukuhan Pakej Rangsangan Ekonomi;
- v. Mengetuai #BarisanHadapanEkonomi dalam pembukaan operasi sektor-sektor ekonomi;
- vi. Memimpin rundingan-rundingan hubungan ekonomi dua hala, serantau dan global;
- vii. Menyokong transformasi syarikat tempatan ke arah pendigitalan dan penggunaan analisis data raya;
- viii. Memastikan usaha-usaha MITI yang menyokong pemulihan ekonomi diterapkan di dalam Pakej Rangsangan Ekonomi Prihatin (PRIHATIN) dan Pelan Jana Semula Ekonomi Negara (PENJANA); dan
- ix. Menjadi ikon MITI di kalangan media.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI RICHARD RIOT ANAK JAEM [ SERIAN ]**

**TARIKH : 13 OGOS 2020 (KHAMIS)**

**SOALAN**

**DATO' SRI RICHARD RIOT ANAK JAEM [ SERIAN ]** minta **MENTERI KESIHATAN** menyatakan status pelantikan ke jawatan tetap Pegawai-pegawai Perubatan (Gred UD41), Pegawai-pegawai Farmasi (Gred UF41) dan Pegawai-pegawai Pergigian (Gred UG41) yang dilanjutkan kontrak mereka selama 6 bulan pada tahun 2019.

**JAWAPAN**

**Tuan Yang di-Pertua,**

1. Pelanjutan kontrak selama enam (6) bulan bagi Pegawai Perubatan (Gred UD41), Pegawai Pergigian (Gred UG41) dan Pegawai Farmasi (Gred UF41) telah **dibuat pada tahun 2020** bagi **menyokong usaha** Kementerian Kesihatan memastikan kesinambungan perkhidmatan serta membantu membendung penularan wabak COVID-19. Sehingga kini, **tiada dalam kalangan** Pegawai Perubatan tersebut yang telah diberikan lantikan tetap memandangkan tiada kekosongan jawatan.
2. Sehingga 31 Julai 2020, seramai 19,909 Pegawai Perubatan yang telah dilantik secara kontrak di Kementerian Kesihatan Malaysia (KKM) dan seramai 665 orang pegawai perubatan (3.3%) lantikan kontrak telah diberi pelantikan tetap.
3. Bagi Pegawai Pergigian pula, pelanjutan kontrak ini telah ditawarkan kepada **seramai 388 pegawai** yang telah tamat menjalani khidmat wajib selama tiga (3) tahun. Manakala **seramai 661** Pegawai Farmasi yang telah tamat menjalani latihan siswazah dan khidmat wajib dalam tempoh tiga (3) tahun juga turut ditawarkan pelanjutan kontrak yang sama.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK ZAKARIA BIN MOHD. EDRIS @ TUBAU  
[LIBARAN]**

**TARKIH : 13 OGOS 2020 (KHAMIS)**

**SOALAN**

**DATUK ZAKARIA BIN MOHD. EDRIS @ TUBAU [ LIBARAN ]** minta **MENTERI KESIHATAN** menyatakan perancangan Kementerian untuk membina dan menaik taraf Bangunan Klinikal '*Clinical Block*' baru di Hospital Duchess of Kent, Sandakan, Sabah di bawah RMK-12.

**JAWAPAN**

**Tuan Yang di-Pertua,**

1. Kementerian Kesihatan Malaysia (KKM) sentiasa berusaha menambahbaik capaian sistem perkhidmatan kesihatan demi kesejahteraan rakyat Malaysia termasuk penduduk di Sabah dan Sarawak.
2. Antara projek yang akan dilaksanakan ialah **Projek Naiktaraf Blok Wad Lama** dan **Jabatan Farmasi Hospital Duchess of Kent, Sandakan** telah diluluskan di bawah *Rolling Plan* 1 Rancangan Malaysia ke-11 (RP1 RMK-11) dengan kos sebanyak RM12,220,385.00. Projek ini telah ditender pada 27 Disember 2019 dan Surat Setuju Terima dijangka pada September 2020.

3. Projek naiktaraf ini akan melibatkan:
  - 3.1 Menaiktaraf Bangunan Wad Bersalin Dan Bangunan Blok Lama Membabitkan Kerja-Kerja Pendawaian Elektrik Semula, Perpaipan (Sistem Bekalan Air Sejuk Dan Air Panas);
  - 3.2 Mengubahsuai Pelan Lantai Wad-Wad Di Blok Lama Kepada Konsep Kubikal Serta Kerja-Kerja Pembaikan; dan
  - 3.3 Bangunan Farmasi yang baharu.
4. Selain itu, Projek Penggantian Lif di Blok Pakar Hospital Duchess Of Kent, Sandakan juga telah diluluskan di bawah *Rolling Plan 1* (2016-2017) Rancangan Malaysia ke-11 dengan kos sebanyak RM1.2Juta.
5. Bagi **projek Pembinaan Blok Klinik Baru Hospital Duchess Of Kent, Sandakan, Sabah, ia telah dimasukkan ke dalam senarai masterplan Jabatan Kesihatan Negeri (JKN) Sabah di bawah Rolling Plan 1, Rancangan Malaysia Ke -12 (RP1, RMK12).**
6. Kementerian Kesihatan bersama Jabatan Kerja Raya (JKR) dan Agensi-agensi Kerajaan yang lain sentiasa bekerjasama dengan erat bagi memastikan projek ini berjalan dengan lancar. Adalah menjadi aspirasi Kementerian ini agar projek-projek ini disiapkan pada masa, kos dan standard yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN TERESA KOK SUH SIM [ SEPUTEH ]**

**TARIKH : 13 OGOS 2020 (KHAMIS)**

**SOALAN**

**PUAN TERESA KOK SUH SIM [ SEPUTEH ]** minta **MENTERI WILAYAH PERSEKUTUAN** menyatakan sebab Kementerian menggugurkan Lembaga Perlesenan Eksais yang pada awal Jun ini dan tidak melantik anggota baru dalam lembaga tersebut, bukannya ini akan menjejaskan ratusan permohonan lesen baru dan pembaharuan lesen di Kuala Lumpur.

**JAWAPAN**

Tuan Yang Di Pertua,

Untuk makluman Yang Berhormat Seputeh, saya ingin memberi penjelasan bahawa dalam jawapan bertulis yang dikemukakan oleh Kementerian ini kepada Parlimen, Kementerian menyatakan “Kementerian ini telah menyemak dan menyusun semula keanggotaan Lembaga ini. Proses ini selaras dengan keputusan Jemaah Menteri dalam Mesyuarat bertarikh 11 Mac 2020 mengenai pelantikan Pengerusi dan Ahli Lembaga Pengarah Agensi dan anak syarikat berkaitan kerajaan, sebelum lantikan baharu dibuat. Dalam hal ini, proses pelantikan baharu untuk Ahli Lembaga Pelesenan Eksais Wilayah Persekutuan Kuala Lumpur telahpun dilaksanakan.”

Sukacita saya memaklumkan, pelantikan 5 orang Ahli Lembaga Pelesenan Eksais yang baharu bagi tempoh 3 tahun berkuatkuasa 20 Julai 2020 sehingga 19 Julai 2023 dalam proses pewartaan. Bagaimanapun ahli-ahli Lembaga boleh bersidang tanpa perlu kelulusan Kementerian Kewangan dan tanpa perlu diwartakan sebagaimana anggapan Yang Berhormat kerana:

- (i) Menteri Kewangan telah menurunkan kuasa kepada Menteri yang bertanggungjawab terhadap Wilayah Persekutuan bagi tujuan pelantikan Ahli Lembaga Pelesenan Eksais Wilayah Persekutuan selaras dengan Seksyen 86 Akta Eksais; dan
- (ii) tiada keperluan dari segi perundangan di bawah Akta Eksais 1976 untuk pewartaan pelantikan ahli Lembaga ini, bagaimanapun DBKL tetap melaksanakan proses pewartaan sebagaimana amalan lazim.

Sekian, terima kasih.

**PERTANYAAN JAWAB LISAN DEWAN RAKYAT  
JAWAPAN OLEH YB DATO' SRI DR. ADHAM BIN BABA  
MENTERI KESIHATAN MALAYSIA**

**PERTANYAAN : LISAN**

**DARIPADA : TUAN SU KEONG SIONG [KAMPAR]**

**TARIKH : 13 OGOS 2020 (KHAMIS)**

**SOALAN**

**TUAN SU KEONG SIONG [ KAMPAR ]** minta **PERDANA MENTERI** menyatakan status terkini cadangan pembinaan Hospital Kampar yang telah diluluskan oleh Kerajaan Pakatan Harapan.

**JAWAPAN**

**Tuan Yang di-Pertua,**

1. Kementerian Kesihatan Malaysia sedia maklum akan cadangan pembinaan Hospital Kampar ini. Untuk makluman, tapak cadangan asal bagi pembinaan Hospital Kampar baharu adalah tanah milik Persekutuan di PT 23109 HSD 12626, Mukim Kampar, Daerah Kampar, Perak berkeluasan 104.23 ekar. Walau bagaimanapun, berdasarkan ulasan teknikal, tapak ini adalah tidak sesuai untuk dibangunkan kerana akan melibatkan kos kerja tanah yang sangat tinggi memandangkan hampir lapan puluh peratus (80%) daripada tapak tersebut merupakan bekas kawasan lombong.

2. Sehubungan itu, pada masa ini Kementerian Kesihatan Malaysia sedang dalam proses pertimbangan bagi menentukan tapak cadangan alternatif yang bersesuaian untuk tujuan tapak pembinaan Hospital Kampar yang baharu. Kementerian Kesihatan Malaysia akan memuktamadkan tapak cadangan setelah mendapat ulasan dari segi teknikal berhubung kesesuaian tapak cadangan untuk tujuan pembinaan Hospital Kampar baharu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB. TUAN CHONG CHIENG JEN [STAMPIN]**

**TARIKH : 13 OGOS 2020**

**SOALAN**

**YB TUAN CHONG CHIENG JEN [STAMPIN]** minta **PERDANA MENTERI** menyatakan apakah rasional dan asas pendakwaan Musa Aman di mahkamah ditarik balik oleh pendakwa raya.

**JAWAPAN: (YB DATO' TAKIYUDDIN BIN HASSAN, MENTERI DI JABATAN PERDANA MENTERI)**

Tuan Yang di-Pertua,

Sebagaimana Ahli Yang Berhormat sedia maklum, melalui kenyataan media bertarikh 9 Jun 2020, Peguam Negara telahpun menjelaskan mengenai tindakan yang diambil berhubung dengan kes PP v Tan Sri Musa Aman.

Tindakan tersebut adalah berdasarkan Fasal (3) Perkara 145 Perlembagaan Persekutuan, keputusan untuk memulakan, menjalankan, atau memberhentikan apa-apa prosiding bagi sesuatu kesalahan merupakan budi bicara Peguam Negara. Tindakan menarik balik pendakwaan terhadap bekas Ketua Menteri Sabah, Tan Sri Musa Aman dibuat selaras dengan peruntukan tersebut setelah membuat pertimbangan atas perkara-perkara yang berikut:

- (a) penerimaan representasi yang dikemukakan kepada Jabatan Peguam Negara pada 13 Mei 2020 memohon agar pendakwaan tidak diteruskan dan ditarik balik serta satu affidavit sokongan yang telah difailkan di Mahkamah pada 5 Jun 2020;
- (b) keterangan dokumentar syarikat dan perbankan yang dijangka tidak dapat diperoleh secara Permohonan Bantuan Bersama dalam Perkara Jenayah (*Mutual Legal Assistance*). Jabatan Peguam Negara dimaklumkan oleh pihak *Department of Justice* Hong Kong bahawa syarikat dan bank di Hong Kong hanya dikehendaki menyimpan rekod selama tempoh tujuh (7) tahun dan berkemungkinan besar syarikat dan bank tersebut tidak lagi memiliki rekod atau dokumen berkenaan;
- (c) saksi-saksi utama telah meninggal dunia, mengalami masalah kesihatan yang serius atau tidak lagi berada di Malaysia; dan
- (d) *Independent Commission Against Corruption Hong Kong* telah memaklumkan melalui surat bertarikh 22 Disember 2011 yang menyatakan siasatan mereka terhadap Tan Sri Musa Aman telah lengkap dan berdasarkan fakta-fakta yang diketahui tiada tindakan siasatan lanjut akan dijalankan.

Setelah meneliti dan mengkaji keseluruhan keterangan bagi kes tersebut, Jabatan Peguam Negara berpandangan bahawa pendakwaan adalah tidak wajar diteruskan dan memutuskan untuk tidak membuat rayuan terhadap pembebasan sepenuhnya yang diputuskan oleh Mahkamah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' JOHARI BIN ABDUL  
[SUNGAI PETANI ]**

**TARIKH : 13 OGOS 2020 (KHAMIS)**

**SOALAN**

**DATO' JOHARI BIN ABDUL [ SUNGAI PETANI ]** minta **PERDANA MENTERI** menyatakan adakah Kerajaan bercadang memperkenalkan Akta Anti Lompat Parti Wakil Rakyat bagi mencegah gejala lompat parti di kalangan wakil rakyat setelah dipilih dalam pilihan raya. Sekiranya tidak, apakah pertimbangan Kerajaan dan bagaimana cara penyelesaian isu lompat parti ini.



**JAWAPAN : (YB DATO' TAKIYUDDIN BIN HASSAN, MENTERI DI  
JABATAN PERDANA MENTERI)**

Tuan Yang di-Pertua,

Pada masa ini, Kerajaan berpandangan bahawa setiap warganegara masih dijamin hak untuk bebas berpersatuan yang selaras dengan Perkara 10 (1) (C) Perlembagaan Persekutuan. Hak untuk bebas berpersatuan ini turut telah dibincangkan dalam keputusan Mahkamah Persekutuan dalam kes Dewan Undangan Negeri Kelantan & Anor v Nordin bin Salleh & Anor [1992] 1 CLJ 343.

Namun, sekiranya Kerajaan berpandangan terdapat keperluan untuk menggubal undang-undang lompat parti ini pada masa akan datang, sudah pasti kajian terperinci akan dilakukan termasuklah dengan mengadakan perbandingan *best practices* dengan negara-negara lain;

Kajian secara terperinci ini perlu dilakukan memandangkan perkara ini bercanggah dengan Perkara 10(1)(C) Perlembagaan Persekutuan iaitu hak membentuk persatuan dengan syarat ia tidak membabitkan soal keselamatan, ketenteraman awam atau prinsip moral. Pihak Kerajaan juga perlu mengadakan konsultasi dengan pelbagai pihak lain termasuklah badan bukan Kerajaan dan parti politik jika ianya hendak digubal kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN OSCAR LING CHAI YIEW [SIBU]**

**TARIKH : 13 OGOS 2020**

**SOALAN**

**YB TUAN OSCAR LING CHAI YIEW [SIBU]** minta **PERDANA MENTERI** menyatakan definisi sempadan Kepulauan Spratly, mengapakah terumbu Layang-Layang atau gugusan Semarang Peninjau bukan sebahagiannya.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Kepulauan Spratly merupakan gugusan entiti geografi seperti pulau-pulau kecil dan terumbu karang yang terletak di bahagian selatan Laut China Selatan. Secara amnya, Kepulauan Spratly turut merangkumi Pulau Layang-Layang dan Gugusan Semarang Peninjau yang terletak dalam perairan Malaysia berdasarkan Peta Baru Malaysia 1979.
2. Majlis Keselamatan Negara, Jabatan Perdana Menteri dan agensi keselamatan negara yang berkaitan, khususnya Tentera Laut Diraja Malaysia (TLDM) sentiasa memastikan aspek keselamatan dan kedaulatan maritim negara di kawasan Pulau Layang-Layang dan Gugusan Semarang Peninjau berada dalam keadaan yang aman, selamat dan terpelihara melalui pelaksanaan operasi rondaan maritim khas dan pembinaan Stesen Luar Pantai TLDM.
3. Perkara ini merupakan sebahagian daripada tindakan *effectivities (regulatory and administrative assertions of authority)* yang dilaksanakan oleh Malaysia untuk menzahirkan kedaulatan dan pemilikan ke atas pulau atau terumbu di Malaysia berdasarkan Peta Baru Malaysia 1979. Kerajaan Malaysia akan terus menyelaras dan meningkatkan usaha tersebut bagi memastikan keselamatan dan kedaulatan wilayah negara sentiasa terpelihara.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN RUSNAH BINTI ALUAI [ TANGGA BATU ]**

**TARIKH : 13 OGOS 2020 (KHAMIS)**

**SOALAN**

**PUAN RUSNAH BINTI ALUAI [ TANGGA BATU ]** minta **MENTERI KESIHATAN** menyatakan apakah jangka masa yang ditetapkan bagi rakyat untuk mendapat perkhidmatan yang lebih efisien dari Hospital Besar Melaka terutamanya merujuk kepada sistem pendaftaran dan rekod pesakit yang masih dikendalikan secara manual.

**JAWAPAN**

**Tuan Yang di-Pertua,**

1. Kementerian Kesihatan Malaysia sentiasa komited dalam memberikan perkhidmatan kesihatan yang lebih efisien kepada rakyat Malaysia termasuk di Negeri Melaka. Langkah-langkah untuk meningkatkan efisiensi dilaksanakan secara berfasa dan mengikut keutamaan. Antara langkah-langkah yang diambil oleh KKM untuk memberikan perkhidmatan yang lebih efisien adalah:

- a) Pelaksanaan **Hospital Kluster** sejak 2014. Melalui Hospital Kluster, hospital daerah dan penduduk sekitarnya akan mendapat khidmat kepakaran secara terus dan berkala melalui perkhidmatan kepakaran yang disepadukan dan dikordinasikan dengan lebih bersistematik. Dengan inisiatif ini kesesakan diwad dapat dikurangkan.

- b) Melalui pendekatan ***staggered clinic appointment*** (temujanji berfasa) pesakit hadir pada masa yang telah ditetapkan. Dengan cara ini kesesakan di klinik dapat dikurangkan kerana pesakit datang pada waktu yang ditetapkan sahaja.
  
- c) Mengaplikasikan **Lean Healthcare** dalam proses rawatan pesakit di Zon Hijau Jabatan Kecemasan, dan juga proses kemasukan serta discaj pesakit di wad. Proses kemasukan dan discaj akan menjadi lebih efisien termasuk pengurusan katil yang lebih efektif bagi mengurangkan kesesakan di wad selain mempercepat tempoh menunggu katil bagi pesakit yang memerlukan rawatan pesakit dalam. Contoh inisiatif dalam Lean Healthcare adalah:
  - i. Penubuhan ***Bed Management Unit (BMU)*** untuk kemasukan pesakit elektif serta memastikan pesakit-pesakit yang memerlukan katil dapat diutamakan dengan cepat.
  
  - ii. Projek rintis ***Multi-Disciplinary Short Stay Unit*** untuk pesakit yang memerlukan rawatan sehingga 72 jam. Ini akan membolehkan rawatan awal diberikan kepada pesakit dan mengurangkan masa menunggu pesakit untuk masuk wad.

**Tuan Yang di-Pertua,**

2. Bagi Hospital Melaka, buat masa ini sistem pendaftaran adalah secara manual. Sistem ini akan dinaiktaraf kepada sistem IT setelah bekalan elektrik di Hospital tersebut dipertingkatkan. Projek naik taraf sistem bekalan elektrik di Hospital Melaka sedang berjalan dan dijangka siap pada tahun 2022. Pencarian Rekod Perubatan Pesakit bagi temujanji di klinik pakar disediakan dalam tempoh 3 hari sebelum tarikh temujanji dan telah mencapai 98.29% bagi tahun 2019 iaitu melebihi 95% standard yang telah ditetapkan. Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN LIM LIP ENG [KEPONG]**

**TARIKH : 13 OGOS 2020 (KHAMIS)**

**SOALAN**

**TUAN LIM LIP ENG [ KEPONG ]** minta **MENTERI KESIHATAN** menyatakan kos dan jumlah ujian saringan COVID-19 yang telah dilakukan oleh Kerajaan sehingga bulan Jun. Berapa ramai daripada jumlah ujian tersebut adalah warga asing dan apakah tindakan lanjut Kerajaan terhadap warga asing yang dikesan positif.

**JAWAPAN**

**Tuan Yang di-Pertua,**

1. Sehingga kini, Kementerian Kesihatan Malaysia (KKM) telah membelanjakan sebanyak **RM96 juta** bagi kos reagen dan test kit **untuk ujian saringan COVID-19.** Kementerian Kesihatan telah mula menjalankan ujian saringan COVID-19 sejak bulan Januari 2020, iaitu sejak virus ini mula dikenalpasti dan ujian COVID-19 telah mula tersedia di Malaysia. Sehingga kini, **sebanyak 55 fasiliti awam dan swasta boleh menjalankan ujian COVID-19.** Ujian saringan COVID-19 ini melibatkan ujian *Reverse Transcriptase – Polymerase Chain Reaction* (RT-PCR) dan *Rapid Test Kit (Antigen) (RTK Ag).*

2. Statistik terkini sehingga 6 Ogos 2020, seramai 1,012,660 individu telah menjalani ujian pengesanan COVID-19 di Malaysia. Daripada jumlah tersebut, **sebanyak 72,736 bukan warganegara telah disaring** (7.2%) dan sebanyak **2,683 daripada bukan warganegara ini dikesan positif ujian saringan COVID-19.** Kes yang dikesan positif akan

dimasukkan ke wad isolasi bagi menerima rawatan selanjutnya bergantung kepada keperluan klinikal individu.

3. Mengambil kira terdapat individu yang menjalani ujian pengesanan lebih daripada sekali, maka sehingga 6 Ogos 2020, sebanyak 1,867,673 ujian saringan COVID-19 telah dijalankan, melibatkan 1,742,302 ujian RT-PCR dan 125,371 RTK Ag.

4. Aktiviti pencegahan dan kawalan penyakit adalah penting dalam membendung penularan penyakit termasuklah penyakit COVID-19. Justeru, sama ada warganegara atau bukan warganegara, sama ada pendatang asing dengan izin (PADI) atau pendatang asing tanpa izin (PATI), kesemua orang akan melalui proses yang sama bagi semua aktiviti kesihatan awam di Malaysia seperti:

- a) pengesanan kes dan kontak rapat kes;
- b) pelaksanaan ujian pengesanan COVID-19;
- c) pemberian Perintah Pengawasan Dan Pemerhatian di rumah atau stesen kuarantin;
- d) pengurusan kes dan kontak rapat;
- e) protokol rawatan;
- f) pelaksanaan aktiviti nyah kuman;
- g) pemakluman isu dan nasihat kesihatan; dan
- h) pengurusan jenazah bagi kes kematian COVID-19.

5. Kesemua aktiviti ini penting dalam mengekang penularan COVID-19 dalam masyarakat di Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN HANNAH YEOH TSEOW SUAN  
[ SEGAMBUT ]**

**TARIKH : 13 OGOS 2020 [KHAMIS]**

**SOALAN**

**PUAN HANNAH YEOH TSEOW SUAN [ SEGAMBUT ]** yang meminta **MENTERI KESIHATAN** menyatakan adakah pengambilan suntikan vaksin imunisasi akan diwajibkan kepada kanak-kanak di seluruh negara dan apakah status peruntukan RM60 juta untuk pemberian suntikan vaksin "pneumococcal" yang dijadualkan bermula bulan Jun tahun ini.



**JAWAPAN**

**Tuan Yang di-Pertua,**

1. Kementerian Kesihatan tetap komited di dalam usaha untuk menurunkan morbiditi dan mortaliti akibat jangkitan bakteria pneumokokus ini di kalangan kanak-kanak. Kementerian Kesihatan sedang dalam proses menyediakan bekalan vaksin pneumokokal konjugat (*pneumococcal conjugate vaccine*, PCV) di semua Klinik Kesihatan. Proses perolehan secara tender terbuka vaksin tersebut telah tertangguh susulan kejadian pandemik COVID-19. Buat masa ini, proses perolehan secara tender adalah pada peringkat kelulusan oleh Kementerian Kewangan.

2. Pemberian suntikan vaksin pneumokokal di bawah Program Imunisasi Kebangsaan akan diberikan kepada kanak-kanak yang layak setelah bekalan vaksin tersebut tersedia di semua Klinik Kesihatan. Apabila Program Imunisasi Pneumokokal ini dimulakan kelak, ianya perlu diteruskan bagi mendapatkan kesan yang optimum dalam menurunkan morbiditi dan mortaliti akibat penyakit pneumokokal invasif. Bagi memastikan kesinambungan program ini, peruntukan yang mencukupi secara berterusan perlu dipastikan.

3. Buat masa ini, Kementerian Kesihatan sedang meningkatkan usaha untuk meningkatkan liputan imunisasi bagi vaksin-vaksin sedia ada dalam Jadual Imunisasi Kanak-Kanak Kebangsaan. Kejadian pandemik COVID-19 dan penguatkuasaan Perintah Kawalan Pergerakan telah memberi kesan kepada penerimaan vaksin secara keseluruhan, dan ini meningkatkan risiko berlakunya wabak penyakit cegahan vaksin. Maka, anggota kesihatan sedang menjalankan usaha untuk mengesan kanak-kanak yang telah tercicir imunisasi sepanjang tempoh Perintah Kawalan Pergerakan agar penjadualan semula suntikan vaksin dapat dibuat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN SIM CHEE KEONG  
[BUKIT MERTA JAM]**

**TARIKH : 13 OGOS 2020**

**SOALAN**

**YB TUAN SIM CHEE KEONG [ BUKIT MERTA JAM ]** minta **PERDANA MENTERI** menyatakan senarai gaji dan elaun, senarai portfolio dan juga jawatan bergaji Kerajaan ataupun badan berkaitan Kerajaan berserta gaji Menteri, Timbalan Menteri dan Duta bertaraf Menteri. Nyatakan perbezaan antara Menteri Kanan dan Menteri yang lain.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Gaji yang diberi kepada Anggota Pentadbiran yang meliputi Menteri dan Timbalan Menteri Persekutuan adalah seperti mana yang termaktub di bawah Akta Ahli Parlimen (Saraan) 1980 [Akta 237]. Ia sama seperti mana yang dinikmati oleh Anggota Pentadbiran di bawah pentadbiran Kerajaan Barisan Nasional dan Pakatan Harapan dahulu. Bagi senarai portfolio Anggota Pentadbiran, perkara ini adalah seperti mana yang telah diwartakan melalui Perintah Menteri-Menteri Kerajaan Persekutuan (No. 3) 2020 [P.U.(A) 201/2020] bertarikh 9 Julai 2020.
2. Untuk makluman Ahli Yang Berhormat, Perdana Menteri melantik beberapa Duta Khas bagi membantu Perdana Menteri dalam sesuatu perkara dan diberi saraan bersesuaian dengan kelayakan, tugas dan tanggungjawab yang dipikul.
3. Bagi menggunakan pengurusan sumber secara optimum, mempercepatkan pentadbiran, pengurusan serta mempermudah penyampaian perkhidmatan kepada rakyat, Kerajaan telah mewujudkan Menteri Kanan yang bertanggungjawab terhadap 4 Kluster utama iaitu Kluster Ekonomi, Kluster Keselamatan, Kluster Infrastruktur dan Kluster Sosial. Secara amnya, seorang Menteri Kanan dipertanggungjawabkan untuk mengetuai kluster masing-masing yang di bawahnya terdapat beberapa Menteri atau kementerian. Menteri Kanan dan Menteri menikmati kemudahan yang sama seperti mana termaktub dalam Akta 237 yang saya sebutkan sebentar tadi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TAN KOK WAI [CHERAS]**

**TARIKH : 13 OGOS 2020**

**SOALAN**

**YB TAN KOK WAI [CHERAS]** minta **PERDANA MENTERI** menyatakan jumlah pesalah yang mengingkari Perintah Kawalan Pergerakan (PKP), Perintah Kawalan Pergerakan Bersyarat (PKPB) dan Perintah Kawalan Pergerakan Pemulihan (PKPP) mengikut kategori warganegara dan bukan warganegara, serta jumlah denda yang dikutip oleh Kerajaan dan jumlah pesalah yang dihukum penjara.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Perintah Kawalan Pergerakan (PKP) merupakan satu langkah kawalan dan pencegahan yang dilaksanakan oleh kerajaan di seluruh negara bagi mengurangkan penularan wabak COVID-19. Pengisytiharan kawalan pergerakan ini adalah berdasarkan kepada Akta Pencegahan Dan Pengawalan Penyakit Berjangkit 1988 [Akta 342]. Ia dilaksanakan secara 3 peringkat iaitu PKP yang bermula pada 18 Mac 2020 hingga 3 Mei 2020, Perintah Kawalan Pergerakan Bersyarat (PKPB) bermula pada 4 Mei 2020 hingga 9 Jun 2020, dan diikuti Perintah Kawalan Pergerakan Pemulihan (PKPP) yang bermula pada 10 Julai 2020 hingga 31 Ogos 2020.

2. Sehingga 10 Julai 2020, jumlah tangkapan warganegara Malaysia yang dilakukan oleh Polis DiRaja Malaysia (PDRM) atas kesalahan mengingkari PKP ialah seramai 18,461 orang, manakala 1463 orang semasa tempoh PKPB, dan 229 orang semasa tempoh PKPP. Bagi bukan warganegara pula, PDRM telah menangkap seramai 5,620 orang semasa PKP, 822 orang semasa PKPB, dan 229 orang semasa tempoh PKPP.

3. Daripada jumlah tangkapan tersebut, seramai 4,355 orang telah dikenakan hukuman penjara dalam tempoh PKP, 636 orang semasa PKPB, dan 88 orang pula semasa PKPP. Bagi tempoh 18 Mac 200 hingga 10 Julai 2020, sebanyak 10,466 kompaun telah dikeluarkan oleh Kementerian Kesihatan Malaysia (KKM) dengan jumlah kutipan denda sebanyak RM 5,928,000.00.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN NOORITA BINTI SUAL [TENOM ]**

**TARIKH : 13 OGOS 2020 ( KHAMIS )**

**SOALAN**

**YB PUAN NOORITA BINTI SUAL [ TENOM ]** minta **PERDANA MENTERI** menyatakan apakah ‘plea bargain’ yang terkandung dalam kes Riza Aziz memandangkan mangsa yang terlibat bukan seorang dua tetapi melibatkan seluruh rakyat Malaysia. Adakah Riza Aziz turut memberi maklumat rakan-rakan subahat beliau. Setakat ini berapa wang seperti yang dijanjikan telah dikembalikan kepada rakyat Malaysia.

**JAWAPAN: (YB DATO’ TAKIYUDDIN BIN HASSAN, MENTERI DI JABATAN PERDANA MENTERI )**

Tuan Yang di-Pertua

Sebagaimana Ahli Yang Berhormat sedia maklum, Jabatan Peguam Negara melalui Kenyataan Media bertarikh 17 Mei 2020, telahpun menjelaskan mengenai tindakan yang diambil berhubung dengan kes Pendakwa Raya v Riza Shahriz bin Abdul Aziz.

Berdasarkan Fasal (3) Perkara 145 Perlembagaan Persekutuan, keputusan untuk memulakan, menjalankan, atau memberhentikan apa-apa prosiding bagi sesuatu kesalahan merupakan budi bicara Peguam Negara. Keputusan untuk memohon suatu perintah pelepasan tanpa pembebasan (DNAA) ke atas kelima-lima pertuduhan terhadap Riza Shahriz bin Abdul Aziz dibuat selaras dengan Fasal (3) Perkara 145 Perlembagaan Persekutuan setelah membuat pertimbangan atas perkara-perkara yang berikut:

- (a) bahawa pada 18 November 2019, peguam cara kepada Riza Shahriz bin Abdul Aziz telah menghantar satu surat representasi kepada Jabatan Peguam Negara memohon agar semua pertuduhan terhadap Riza Aziz di Mahkamah Sesyen Kuala Lumpur dikaji semula. Surat representasi ini, antara lain, telah mencadangkan agar Riza Aziz—
- (i) menyerahkan haknya ke atas tiga hartanah yang telah disita oleh Jabatan Kehakiman Amerika Syarikat dan Riza Aziz perlu memberikan kerjasama untuk mengembalikan harta-harta tersebut atau nilainya kepada Kerajaan Malaysia. Hartanah tersebut adalah :
- a. satu unit banglo di Beverly Hills, California;
  - b. satu unit pangsapuri di New York; dan
  - c. satu unit rumah bandar di London, United Kingdom;
- (ii) bersetuju agar wang yang dirampas daripadanya yang menjadi hal perkara dalam satu kes di Mahkamah Tinggi Kuala Lumpur, dilucuthakkan kepada Kerajaan Malaysia; dan
- (iii) membayar sejumlah kompaun selaras dengan peruntukan seksyen 92 Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [*Akta 613*];
- (b) bahawa Peguam Negara pada masa itu, Tan Sri Tommy Thomas, setelah meneliti surat representasi yang dihantar oleh peguam cara kepada Riza Shahriz bin Abdul Aziz itu, melalui minit bertarikh 19 November 2019 telah memohon pandangan daripada Timbalan Kanan Pendakwa Raya Dato' Seri Gopal Sri Ram dan turut menyatakan berdasarkan cadangan-cadangan yang dinyatakan di atas, beliau bersedia untuk memberikan pertimbangan kepada representasi tersebut;

- (c) bahawa Dato' Seri Gopal Sri Ram, setelah berbincang dengan Puan Latheefa Koya, Ketua Pesuruhjaya SPRM pada masa itu, telah mencadangkan agar cadangan-cadangan yang dinyatakan dalam representasi tersebut diterima oleh SPRM. Peguam Negara juga telah dinasihatkan bahawa Tan Sri Tommy Thomas telah secara prinsip bersetuju dengan cadangan tersebut. Ini telah membuka jalan kepada rundingan lanjut dan perancangan mekanisme yang perlu diambil, diadakan;
- (d) bahawa pada 11 Mac 2020, peguam cara kepada Riza Shahriz bin Abdul Aziz telah menghantar satu lagi surat representasi yang mengukuhkan cadangan-cadangan yang telah dikemukakan sebelum ini dan memberikan aku janji bahawa, sekiranya Riza Aziz gagal untuk mematuhi mana-mana terma dan syarat yang dinyatakan, kelima-lima pertuduhan pengubahan wang haram yang dikenakan ke atasnya dikekalkan; dan
- (e) bahawa pendirian terdahulu Tan Sri Tommy Thomas telah ditaklimatkan oleh Timbalan-Timbalan Pendakwa Raya yang mengendalikan perkara ini dan Peguam Negara bersependapat dengan pandangan Tan Sri Tommy Thomas sebagaimana yang telah ditaklimatkan itu dan Peguam Negara telah bersetuju untuk menerima tawaran Riza Aziz tertakluk kepada pematuhan yang ketat terhadap semua terma dan syarat.

Sehubungan dengan persetujuan itu, pada 16 April 2020, pihak SPRM telah membalas surat peguam cara kepada Riza Shahriz bin Abdul Aziz yang secara asasnya menyatakan bahawa Pendakwa Raya bersedia untuk memohon satu perintah pelepasan tanpa pembebasan (DNAA) ke atas kelima-lima pertuduhan tertakluk kepada Riza Aziz mengambil langkah-langkah untuk memastikan semua wang dan harta-harta yang disita dikembalikan kepada Kerajaan Malaysia dan seterusnya membayar kompaun selaras dengan seksyen 92 Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [*Akta 613*].



Seterusnya, pada 21 April 2020, pihak SPRM telah menulis kepada pihak peguam cara kepada Riza Shahriz bin Abdul Aziz mengarahkan agar Riza Aziz turut melepaskan hak, hak milik, dan kepentingannya ke atas satu lagi aset yang dikenali sebagai "*Metropolis Poster*" yang merupakan sebuah poster 3-helai berwarna litograf berbingkai ciptaan seorang pelukis dari Jerman bernama Heinz Schulz-Neudamm untuk filem senyap bertajuk "*Metropolis*" yang telah diterbitkan pada tahun 1927.

Pada 13 Mei 2020, pihak SPRM sekali lagi telah menulis kepada pihak peguam cara kepada Riza Shahriz bin Abdul Aziz mengarahkan Riza Aziz untuk turut memindahkan sejumlah USD14,087,072.76 yang berada di dalam satu akaun *escrow* di Huntington National Bank di Amerika Syarikat kepada Kerajaan Malaysia.

Lanjutan daripada perkiraan ini, Kerajaan Malaysia dijangka akan menerima kembali sejumlah kira-kira USD108 juta (tertakluk kepada harga jualan sebenar aset-aset dan penolakan apa-apa kos) untuk dikreditkan ke dalam Akaun Amanah Pemulihan Aset 1MDB. Ini adalah tambahan kepada USD57,036,688.68 yang telah dilucuthak sebelum ini pada bulan April 2019 daripada Red Granite Pictures, sebuah syarikat yang dimiliki bersama oleh Riza Aziz, yang dana tersebut dapat dikesan berkaitan dengan 1MDB.

Ditekankan bahawa keputusan untuk memohon perintah pelepasan tanpa pembebasan (DNAA) terhadap Riza Aziz dibuat tertakluk pematuhan Riza Aziz terhadap syarat-syarat yang dikenakan. Keseluruhan perkiraan ini adalah sebahagian daripada usaha berterusan Kerajaan dalam mendapatkan kembali aset-aset berkaitan dengan 1MDB. Rundingan tersebut adalah amat rumit, memerlukan kerjasama erat dengan pihak berkuasa di luar negara, dan masih berterusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK LIEW VUI KEONG  
[BATU SAPI]**

**TARIKH : 13 OGOS 2020 (KHAMIS)**

**SOALAN**

**YB DATUK LIEW VUI KEONG [BATU SAPI]** minta **PERDANA MENTERI** menyatakan adakah Kerajaan akan meneruskan usaha mulia meminda klasifikasi cubaan bunuh diri sebagai satu kesalahan jenayah di bawah Seksyen 305, 306 dan 309 Kanun Keseksaan memandangkan cubaan membunuh diri merupakan keadaan kesihatan mental yang perlu dirawat dan bukannya dihukum.

**JAWAPAN : (YB DATO' TAKIYUDDIN BIN HASSAN, MENTERI DI  
JABATAN PERDANA MENTERI)**

Tuan Yang di-Pertua,

Kerajaan melalui Jabatan Peguam Negara mengambil inisiatif untuk mengkaji undang-undang berkenaan dengan kesalahan persubahatan dan percubaan membunuh diri di Malaysia. Ini kerana berdasarkan statistik setakat 2015, insiden percubaan membunuh diri semakin meningkat dan meliputi pelbagai peringkat umur. Percubaan membunuh diri berlaku disebabkan oleh pelbagai faktor. Oleh yang demikian, pendekatan yang lebih holistik perlu diambil untuk mengekang perbuatan tersebut.

Bahagian Pertama kajian ini ditumpukan kepada kesalahan percubaan membunuh diri di bawah seksyen 309 Kanun Keseksaan. Manakala Bahagian Kedua kajian ditumpukan kepada kesalahan persubahatan membunuh diri di bawah seksyen 305 dan 306 Kanun Keseksaan. Pada masa kini, Bahagian Pertama kajian ini sedang dalam peringkat rundingan dengan pihak yang berkepentingan.

Jabatan Peguam Negara juga sedang menimbangkan cadangan daripada pihak berkepentingan untuk mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan bagi mendapatkan rawatan yang sewajarnya.

Kajian yang dibuat juga termasuk perbandingan peruntukan undang-undang mengenai percubaan untuk membunuh diri di United Kingdom, New Zealand, India dan Singapura.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TACK [ BENTONG ]**

**TARIKH : 13 OGOS 2020 (KHAMIS)**

**SOALAN**

minta **MENTERI SAINS, TEKNOLOGI DAN INOVASI** menyatakan sama ada IAEA (International Atomic Energy Agency) pernah membuat sebarang review untuk fasa operasi (*operational stage*) kilang Lynas.

**JAWAPAN**

Tuan Yang di-Pertua,  
Untuk makluman Ahli Yang Berhormat,

Agensi Tenaga Atom Antarabangsa (International Atomic Energy Agency, IAEA) telah membuat penilaian terhadap kilang Lynas sebanyak 2 kali, iaitu:

- i. pada 29 Mei – 3 Jun 2011 untuk menilai keperluan bagi tujuan pengeluaran lesen Peringkat Pengendalian Sementara (*Temporary Operating License, TOL*); dan
- ii. pada 13 – 17 Oktober 2014 untuk menilai status perlaksanaan saranan IAEA tahun 2011 sepanjang tempoh operasi TOL bagi tujuan pengeluaran Lesen Pengendalian Penuh (*Full Operating Stage License, FOSL*).

Keseluruhan penemuan oleh Panel Pakar Bebas Antarabangsa dari IAEA mendapati bahawa projek Lynas telah mematuhi semua peruntukan

perundangan sama ada di peringkat kebangsaan mahupun standard atau amalan terpuji antarabangsa, selain mendapati kerangka perundangan negara berkaitan kawalseliaan, standard keselamatan sinaran di Malaysia adalah setanding, malah dalam beberapa aspek melebihi standard antarabangsa yang diamalkan oleh negara luar. Hasil daripada laporan tersebut telah dijadikan asas bagi permohonan lesen pengendalian penuh kepada syarikat Lynas.

Selain daripada penilaian oleh AEIA, beberapa Jawatankuasa dan pakar juga telah menilai operasi Lynas iaitu:

- a) Jawatankuasa Panel Teknikal Khas Projek Lynas (2011);
- b) Jawatankuasa Perundingan Awam (JKPA) Projek Lynas (2011);
- c) Jawatankuasa Unit Pemantauan Bebas bagi Audit Pembinaan (2012);
- d) Parliament Select Committee (PSC) (2012);
- e) Jawatankuasa Eksekutif Penilaian Operasi Lynas Advanced Materials Plant (LAMP) (2018); dan
- f) Jawatankuasa Teknikal Penilaian Kesesuaian Lokasi Kemudahan Pelupusan Kekal (PDF) Oleh Lynas (M) Sdn Bhd (2020).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DR. ONG KIAN MING [BANGI]**

**TARIKH : 13 OGOS 2020 (KHAMIS)**

**SOALAN**

**YB DR. ONG KIAN MING [ BANGI ]** minta **MENTERI PERDAGANGAN ANTARABANGSA DAN INDUSTRI** menyatakan sama ada Saluran Khas China (China Special Channel) yang telah ditubuhkan oleh Kerajaan Pakatan Harapan (PH) untuk menarik pelaburan berkualiti dari China ke Malaysia akan dilanjutkan di bawah Kerajaan Perikatan Nasional (PN) dan apakah strategi baharu yang sedang dirancang untuk terus menarik pelaburan berkualiti dari China ke Malaysia 2020.

**JAWAPAN**

Tuan Yang di-Pertua,

1. Kementerian Perdagangan Antarabangsa dan Industri telah memutuskan bahawa inisiatif Saluran Khas China (*China Special Channel* - CSC) akan diterajui oleh Lembaga Pembangunan Pelaburan Malaysia (MIDA) sebagai *one-stop centre* dan agensi promosi pelaburan utama Malaysia.
2. Selaras dengan mandat dan peranan sebagai agensi utama promosi pelaburan dan penyelarass strategi promosi dengan agensi-agensi promosi pelaburan yang lain termasuk InvestKL, keputusan serta langkah ini amat penting bagi memberi mesej yang jelas tanpa menimbulkan kekeliruan di kalangan para pelabur asing termasuk dari negara China.

3. Selain daripada itu, keputusan ini juga amat bertepatan dengan peranan MIDA sebagai sekretariat kepada Jawatankuasa Nasional Mengenai Pelaburan (*National Committee on Investment - NCI*) yang bertanggungjawab untuk mempercepatkan proses kelulusan projek pelaburan yang berkualiti tinggi. Justeru, pelaksanaan CSC dijangka akan lebih efektif memandangkan MIDA menyediakan ekosistem industri yang menyeluruh di Malaysia dan memberikan fasilitasi berterusan kepada para pelabur.

**Tuan Yang di-Pertua,**

4. Sungguhpun Malaysia berhadapan dengan pandemik COVID-19 dan ketidaktentuan ekonomi global, Malaysia masih dilihat oleh para pelabur asing termasuk daripada China, sebagai destinasi pelaburan utama yang berdaya saing di rantau ini. Malah, China merupakan sumber pelaburan langsung asing terbesar dalam sektor perkilangan semenjak tahun 2016.

5. Bagi tempoh 2016 hingga 2019, projek-projek pelaburan dalam sektor perkilangan yang diluluskan dari China adalah sebanyak RM40.26 bilion yang menyediakan sejumlah 40,527 peluang pekerjaan dalam industri berikut:

- (i) Elektrik dan eletronik;
- (ii) Teknologi pengangkutan;
- (iii) Produk getah;
- (iv) Produk mineral bukan logam; dan
- (v) Kertas, percetakan dan penerbitan.

6. Sehingga 31 Mei 2020, MIDA juga telah memberikan khidmat fasilitasi kepada 86 syarikat dari China dan juga negara-negara lain yang berminat untuk menempatkan operasi di Malaysia. Daripada jumlah ini, MIDA telah berjaya menarik sejumlah 32 projek dengan pelaburan berjumlah RM17.5 bilion, di mana 28 projek dengan pelaburan berjumlah RM8.36 bilion telah diluluskan dan empat (4) projek dengan pelaburan berjumlah RM9.14 bilion sedang dinilai.

**Tuan Yang di-Pertua,**

7. Di antara strategi yang dilaksanakan oleh MIDA dalam menarik pelaburan berkualiti dari China ke Malaysia adalah:

- (i) Penubuhan *MIDA China Team* yang terdiri daripada tiga (3) pejabat luar negara di pusat-pusat industri strategik iaitu Beijing, Shanghai dan Guangzhou dan '*China Desk*' di ibu pejabat MIDA;
- (ii) Memanfaatkan peluang pelaburan daripada dasar Kerajaan China Semasa iaitu *Belt & Road Initiative (BRI)* melalui pembinaan taman perindustrian, hab logistik serta *Transit Oriented Developments (TOD)*;
- (iii) Memudahkan aliran masuk pelaburan asing ekoran isu hubungan antara ketegangan perdagangan di antara Amerika Syarikat - China;
- (iv) Menyasarkan 10 sektor keutamaan di bawah dasar '*Made in China 2025*' termasuk mesin automatik dan robotik, aeroangkasa dan aeronautik, biopharma dan peralatan perubatan teknologi maklumat canggih, bahan baharu dan kenderaan dan peralatan tenaga baharu;
- (v) Menyasarkan syarikat-syarikat China yang terlibat dalam sektor teknologi dan tersenarai di *Fortune China 500* serta *Global Unicorns*;
- (vi) Mengenal pasti dan memudahkan syarikat-syarikat multinasional yang merancang untuk memindahkan operasi mereka dari China ke Malaysia, termasuk para pelabur dari Amerika Syarikat, Jepun, Korea Selatan dan Eropah dengan mempromosikan Malaysia sebagai pangkalan alternatif baharu di rantau Asia. Projek-projek yang disasarkan termasuk berteknologi tinggi, nilai ditambah yang tinggi, berintensif pengetahuan, kemahiran intensif, berorientasi



eksport, berintensif modal, reka bentuk dan penyelidikan dan pembangunan;

- (vii) Memastikan kelancaran pelaksanaan dan operasi projek-projek pelaburan dari negara China melalui *Project Acceleration and Coordination Unit (PACU)* di bawah MIDA serta menawarkan bantuan melalui rundingan terus dan kerjasama dengan pihak-pihak berkuasa berkenaan di peringkat persekutuan dan negeri;
- (viii) Pemberian lanjutan tempoh pelaksanaan projek bagi sektor perkilangan selama 12 bulan tambahan secara automatik, selepas syarikat telah mendapat kelulusan interim atau Lesen Pengilang di bawah Akta Penyelarasan Perindustrian, 1975 yang masih belum melaksanakan projek tersebut; dan
- (ix) Pelaksanaan *e-Manufacturing License (e-ML)* yang membolehkan syarikat-syarikat mengemukakan permohonan mereka bagi projek-projek baharu secara atas talian.

**Tuan Yang di-Pertua,**

8. MITI melalui agensi-agensi di bawahnya akan terus berusaha dan bekerjasama erat dengan pelbagai Kementerian dan Agensi di peringkat persekutuan dan negeri dalam menarik pelaburan berkualiti dari China ke Malaysia pada 2020 dan di masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN TERESA KOK SUH SIM [ SEPUTEH ]**

**TARIKH : 13 OGOS 2020 (KHAMIS)**

**SOALAN**

**PUAN TERESA KOK SUH SIM [ SEPUTEH ]** minta **MENTERI WILAYAH PERSEKUTUAN** menyatakan jumlah unit kosong PPR di Kuala Lumpur dan jumlah permohonan penyewaan PPR yang diterima oleh DBKL. Apakah DBKL mempunyai unit atau pasukan khas untuk mempercepatkan proses permohonan bagi golongan yang miskin dan layak menyewa unit PPR.

**JAWAPAN**

Tuan Yang Di Pertua,

Untuk makluman Yang Berhormat Seputeh, Dewan Bandaraya Kuala Lumpur (DBKL) telah menerima sebanyak 29,898 permohonan yang berdaftar sehingga Jun 2020. Manakala jumlah permohonan yang telah diluluskan oleh DBKL adalah sebanyak 1,088 dan masih menunggu tawaran unit kosong. Jumlah kekosongan unit amatlah terhad dan sentiasa berubah dari masa ke semasa.

Untuk makluman Tuan Yang Di Pertua dan Ahli-Ahli Yang Berhormat jua, segala urusan memproses permohonan penyewaan adalah dilaksanakan oleh Unit Pengurusan Perumahan di bawah Jabatan Pembangunan Komuniti dan Kesejahteraan Bandar serta dipertimbangkan melalui Mesyuarat Jawatankuasa Peruntukan Perumahan Awam (JKPRA). Mesyuarat berkenaan bersidang pada setiap minggu dan secara purata, sebanyak 50 permohonan akan dibuat penilaian dalam suatu mesyuarat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI BUNG MOKTAR BIN RADIN  
[KINABATANGAN]**

**TARIKH : 13 OGOS 2020 (KHAMIS)**

**SOALAN**

Minta **MENTERI SAINS, TEKNOLOGI DAN INOVASI** menyatakan apakah perancangan pihak Kementerian untuk melibatkan lebih ramai golongan belia dalam usaha menjayakan dasar sains, teknologi dan inovasi negara.

**JAWAPAN**

Tuan Yang di-Pertua,

Untuk makluman Ahli Yang Berhormat,

1. Kementerian Sains, Teknologi dan Inovasi (MOSTI) memberi penekanan kepada perancangan melibatkan lebih ramai golongan belia dalam usaha menjayakan dasar sains, teknologi dan inovasi negara. Di bawah Dasar Sains, Teknologi dan Inovasi (DSTIN) 2013-2020 sedia ada, MOSTI memberi penekanan kepada keperluan membangun, memupuk dan mengekalkan bakat untuk memacu agenda sains, teknologi dan inovasi (STI) di bawah Teras Strategik 2.

2. MOSTI telah melibatkan pelbagai pemegang taruh antaranya Kementerian/Agensi, Pertubuhan Bukan Kerajaan dan pihak swasta dalam menjayakan agenda STI Negara dengan melaksanakan beberapa program utama yang turut melibatkan belia seperti Minggu Sains Negara, Program Jangkau Luar (*Outreach*) dan pendidikan tidak formal bagi menyemai minat masyarakat terhadap STI dan membudayakan STI kepada kumpulan sasar seperti murid-murid sekolah, belia di Institusi Pengajian Tinggi dan komuniti luar bandar. Selain itu, MOSTI menerusi

*Malaysian Global Innovation and Creativity Centre (MaGIC)* telah melaksanakan beberapa program melibatkan belia iaitu *University Startup Challenge (USC)* serta program bimbingan, latihan dan pementoran untuk para usahawan, termasuk perusahaan sosial di mana 60% penerima manfaat adalah golongan belia.

3. Sebagai usaha berterusan merencanakan agenda STI Negara, MOSTI akan melancarkan inisiatif *National Technology and Innovation Sandbox (NTIS)* yang bertujuan membolehkan penyelidik, penggerak inovasi, *startups* dan usahawan berteknologi tinggi menguji produk, perkhidmatan, model perniagaan dan mekanisme penyampaian yang baharu yang secara tidak langsung akan menarik minat golongan belia untuk menguji hasil inovasi mereka dan menyumbang kepada pengembangan bakat STI tempatan.

4. Selain itu, Pelan Jana Semula Ekonomi Negara (PENJANA) telah diumumkan oleh YAB Perdana Menteri pada 7 Jun 2020 dan Inisiatif Pendigitalan Penyampaian Perkhidmatan Kerajaan yang merangkumi Program Hackathon telah menyenaraikan Cradle Fund sebagai pelaksana inisiatif ini. Inisiatif ini dengan kuantum RM20juta turut melibatkan agensi-agensi lain.

5. MOSTI juga sedang menyediakan Dasar Sains, Teknologi dan Inovasi Negara (DSTIN) 2021-2030 untuk menggantikan DSTIN 2013-2020. Penyediaan DSTIN 2021-2030 telah melalui sesi libat urus, termasuk dengan pertubuhan berkaitan belia seperti Majlis Belia Malaysia dan Pertubuhan Belia Kebangsaan Bersatu Sarawak (SABERKAS) untuk mendapatkan maklum balas agar kepentingan golongan belia turut diambil kira dalam DSTIN 2021-2030.

6. DSTIN 2021-2030 akan memberi tumpuan kepada aspek membangun dan memupuk bakat STI yang adaptif kepada perubahan yang berlaku dalam kehidupan, khususnya disebabkan perubahan teknologi serta membudayakan STI, termasuk di kalangan belia agar mereka dapat menyumbang kepada pembangunan sosio-ekonomi Negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN MUHAMMAD BAKHTIAR BIN WAN  
CHIK [ BALIK PULAU ]**

**TARIKH : 13 OGOS 2020 (KHAMIS)**

**SOALAN**

**YB TUAN MUHAMMAD BAKHTIAR BIN WAN CHIK [ BALIK PULAU ]** minta **PERDANA MENTERI** menyatakan berapakah kadar muflis golongan belia di Malaysia dan apakah langkah-langkah yang akan diambil bagi mengurangkan kadar muflis di kalangan belia pada hari ini.

**JAWAPAN : (YB DATO' TAKIYUDDIN BIN HASSAN, MENTERI DI  
JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, jumlah kes kebangkrapan yang direkodkan dari 2016 hingga bulan Mei 2020 ialah 68,939 kes. Kadar kebangkrapan bagi golongan belia (berumur 34 tahun dan ke bawah) ialah sebanyak 17,555 kes bersamaan dengan 25.46%.

Kerajaan telah mengambil beberapa langkah untuk mengurangkan kadar kebangkrapan di kalangan belia pada masa kini. Namun, cara yang terbaik untuk mengelak daripada kebangkrapan ialah melalui kesedaran individu belia itu sendiri dan masyarakat tentang risiko atau kesan daripada perintah kebangkrapan. Kesedaran ini dapat diterap melalui pendidikan dan pendekatan perbelanjaan yang berhemah.

Bagi membantu mengurangkan kadar kebangkrapan, Kerajaan melalui Jabatan Insolvensi Malaysia (Mdl) telah melaksanakan pelbagai program bagi mewujudkan kesedaran masyarakat tentang isu muflis dengan melaksanakan program bersama masyarakat (*outreach programme*) serta Mdl Prihatin. Program ini bertujuan untuk

menyampaikan maklumat, memberikan pendidikan dan mewujudkan kesedaran kepada orang awam khususnya golongan belia. Ianya termasuklah taklimat dan ceramah kesedaran mengenai isu muflis kepada agensi-agensi awam, swasta, orang awam dan pelajar-pelajar institusi pengajian tinggi awam dan swasta bagi menerangkan kesan dan akibat daripada perintah kebangkrapan. Ini bertujuan untuk memberi pendedahan kepada golongan belia dan pelajar institusi pengajian tinggi supaya masalah ini dapat ditangani di peringkat awal lagi.

Selain itu, Kerajaan juga melalui Agensi Kaunseling dan Pengurusan Kredit (AKPK) iaitu sebuah agensi di bawah Bank Negara Malaysia telah mengadakan program-program untuk memberi kesedaran tentang isu muflis. Program ini juga melibatkan perancangan kewangan kepada semua golongan supaya dapat menangani masalah pengurusan kewangan di peringkat pra kebangkrapan. Pengurusan kewangan yang berhemah akan menjamin kedudukan kewangan di tahap yang terbaik. Melalui program ini akan dapat membantu golongan belia khususnya untuk berbelanja secara berhemah dan bijak dalam pengurusan kewangan bagi mengelakkan kemuflian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KHALID BIN ABD SAMAD  
[SHAH ALAM]**

**TARIKH : 13 OGOS 2020 (KHAMIS)**

**SOALAN**

Minta **PERDANA MENTERI** menyatakan alasan sebenar peletakan jawatan Encik Jalil Rasheed sebagai Pengerusi dan Ketua Eksekutif Kumpulan Permodalan Nasional Berhad.

**JAWAPAN**

Tuan Yang di-Pertua,

1. Sebagai sebuah institusi yang dimandatkan untuk memelihara pelaburan rakyat Malaysia, terutamanya Bumiputera, Permodalan Nasional Berhad (PNB) ditubuhkan dengan tata kelola pemerintahan yang telus, bertanggungjawab dan berintegriti.
2. Berikutan maklumat yang diterima oleh Suruhanjaya Sekuriti bahawa latarbealakang akademik dan pekerjaan yang dikemukakan oleh Encik Jalil Rasheed melalui PNB kepada Suruhanjaya Sekuriti tidak konsisten, pihak Suruhanjaya Sekuriti telah membuat inkuiri tentang perkara ini. Lanjutan daripada itu, Suruhanjaya Sekuriti telah mengadakan satu pertemuan dan perbincangan dengan Encik Jalili Rasheed pada 11 Jun 2020 untuk mendapat penjelasan lanjut daripada beliau.



3. Suruhanjaya Sekuriti juga telah memohon penjelasan daripada Lembaga Pengarah PNB tentang perkara ini melalui surat bertarikh 12 Jun 2020.

4. Pada 13 Jun 2020 Encik Jalil Rasheed telah menyerahkan surat perletakan jawatan beliau sebagai Presiden dan Ketua Pegawai Eksekutif Kumpulan PNB atas sebab peribadi.

5. Peletakan jawatan di atas telah diterima oleh Lembaga Pengarah PNB pada Mesyuarat Khas Lembaga Pengarah pada hari Isnin, 15hb Jun 2020.

6. Berhubung latar belakang akademik Encik Jalil Rasheed, penjelasan rasmi daripada pihak London School of Economics and Political Science (LSE) mengesahkan bahawa seorang graduan yang memegang ijazah daripada University of London bukan merupakan seorang graduan daripada LSE.

7. Dengan sejarah penubuhan dan pencapaian yang melebihi 42 tahun, PNB akan terus memenuhi mandatnya dalam menggalakkan simpanan dalam bentuk dana unit amanah oleh kalangan Bumiputera, yang kemudian akan dilaburkan bagi pihak mereka bagi tujuan meningkatkan kekayaan mereka.

Sekian, terima kasih.